



河南府志



河南府志

卷之六十一

亭

張綱傳漢安元年避道入彼拘行風俗皆舊儒知
理其奉輪於洛陽都亭曰銀當路安問孤祖

ル 5
1546
13



孔 1846 13

1846

河南府志

河南府志卷之六十三

古蹟志九 館池 軒齋庵

亭

漢都亭

張綱傳漢安元年選遣八使徇行風俗皆耆儒知

名多歷顯位唯綱年少官次最微餘人受命之部而綱獨

埋其車輪於洛陽都亭曰豺狼當路安問狐狸

按釋名亭停也人所停集也風俗通春秋國語有寓望謂今亭也民所安定也亭有樓從高省丁聲也漢家因秦大率十里一亭亭留也今語有亭待蓋行旅宿食之所館也亭亦平也民有訟靜吏留辨處勿失其正也據此則亭有數義其別為驛亭為市亭為街亭為門亭其居人多即以名其里曰某亭如都亭者驛亭也旗亭者市亭也漢官典職謂街一亭門一亭者街亭門亭也百官志謂十里一亭有亭長亦謂驛亭其居人多有日柝

河南府志

卷之六十三

古蹟志

一

亭

亭前亭者所謂鄉亭也秦漢所謂亭者類如此隋唐以後乃為園亭專稱雖取古人高軒望遠之義然有選勝之趣非復司姦之舊其事絕不相侔今列亭於園圃後而並取街郵諸亭以類相從亦謂有自來矣

漢街亭 門亭 漢官典職洛陽二十四街街一亭十二城

門門一亭

漢萬壽亭 李固傳夏門亭長注洛陽北西頭門外有萬

壽亭 董宣傳湖陽公主蒼頭殺人宣于夏門亭格殺之

漢前亭 栢亭 士鄉亭 郡國志維陽有前亭 互詳都邑

郡國志注河南城西南有栢亭 馮異傳與武勃戰與士

鄉下注亭名

漢宣德亭 五行志陽嘉二年六月維陽宣德亭地拆近郊

地李固對策曰為陰類專恣將有分離之象

漢富壽亭 通志在府城西北三十七里明帝顯后陵在此

按通志誤當云在府城東北

漢阿亭 靈帝紀光和五年起四百尺觀於阿亭

漢夕陽亭 楊震傳耿寶奏震懷恚望有詔遣歸本郡震行

至城西夕陽亭飲醕而卒

按魏畧楊沛身退之後家無餘積後占河南夕陽亭部苑田二頃起蝸牛廬居止其中妻子凍餓晉書賈充既外出自以為失職深銜任愷計無所從將之鎮百僚餞於夕陽亭其亭歷魏晉皆衍漢舊也

漢安陽亭 王渙傳渙為洛陽令以平正居身得寬猛之宜

渙卒民思其德為立祠安陽亭西每祀輒絃歌而薦之

晉旗亭

〔伽藍記〕建陽里有土臺高三丈此臺是中朝旗亭也上有二層樓懸鼓擊之以罷市

晉華陽亭

〔嵇康傳〕康游洛西宿華陽亭引琴而彈夜分忽有客詣之稱是古人與康共談音律因索琴彈之而為廣陵散聲調絕倫遂以授康

後魏臨澗亭

〔伽藍記〕華林園清暑殿東有臨澗亭

後魏東亭

〔楊昱傳〕王肅出頓洛陽東亭諸王送別昱伯父播同在餞席北海王詳與播競理不為屈北海顧謂昱曰尊伯性剛不伏理大不如尊使君對曰昱父道隆則從其隆道滂則從其滂伯父剛則不吐柔亦不如一坐嘆服

隋逍遙亭

〔大業雜記〕西苑有逍遙亭四面合成結構之麗

冠絕今古

隋閨風亭

翠微亭 〔大業雜記〕甘泉宮中有閨風亭青蓮

峯上有翠微亭遊賞之美於斯為最

隋洛浦亭

見隋歷代亭名

唐含象亭

〔翰林盛事〕開元中拜張說等十八人為學士於

東都上陽宮含象亭圖寫御贊述之

〔翰林志〕開元中張

說等十七人寫真含象亭御製贊

〔玉海〕十八學士張說

知院徐堅為副賀知章陸堅趙東曦咸廩業韋述李子釗

陸去泰呂向母嬰余欽趙元默孫季良康子元侯行果敬

會真馮朝隱一有東方顯 集賢注記張燕公等獻所賦

詩上各賜贊以褒美自於五色箋八分書之

按翰林盛事記開元十八學士翰林志止十七人贊無陸堅馮朝隱玉海列十八學士有馮陸而無東方顯豈獻詩賜贊時止十七人與然攷唐書惟康子元陸堅賀知章三人傳中言帝賜贊他學士傳皆無聞陸堅在十七人贊外而傳稱賜贊是陸堅有贊也馮朝隱亦在十七人贊外而翰林盛事第五有馮朝隱同賜御贊是朝隱亦有贊也合之凡十九人而世但傳十八學士十七人贊何哉附贊張說德重和鼎功踰濟川詞林秀色翰苑光鮮徐堅校書天祿論經上庠英詞婉麗雄辨抑揚賀知章禮樂之司文章之苑學優藝博才高思遠趙冬曦白簡端嚴青史良直清詞雅韻博文強識康子元才識清遠言談幽秘四科文學六書仁義侯行果洪鍾佇叩明鑑不疲理窮繫彖動中威儀韋述職忝山甫業纂元成六義述作四始飛英敬會真名乃會真迹惟契道摳衣講習臨庭振藻趙元默才比邱明學兼儒墨敘述燉婉講論道德東方題地遊天祿門嗣滑稽三冬足用

六藝斯齊季子劍干木流慶指樹貽方諷諫遺缺啟發篇章呂向族茂非熊才高班馬考理篇籍抑揚風雅母異軒墀之任諫諍之職聞詩聞禮有才有識陸去泰才光於晉價重於張州縣斯屈文翰尤長咸興業郁郁高文英才博識持我刑憲是稱諒直余欽文章兩贍才術兼美思在專經學通舊史孫季良蓬山之秀芸閣之英雄詞卓傑雅思縱橫

唐躍掌亭 九洲亭 兩京雜記東京上陽宮有躍掌二亭

唐金谷亭 兩京雜記東都苑內有金谷亭 芳林亭 見前禁苑

唐迎暉亭 環翠亭 名園記裴晉公園有二亭

唐婆娑亭 見前平泉莊

唐琴亭 中島亭 白居易池上篇雖有賓朋無琴酒不能

娛也乃作池西琴亭加石樽焉酒酣琴罷又命樂童登中

島亭合奏霓裳散序聲隨風飄或疑或散悠揚於竹烟波月之際者久之曲未竟而樂天陶然已醉睡於石上矣

唐洛陽河亭 通志李益有詩離亭餞落暉酒減征衣歲

晚烟霞重川寒雲樹微戎裝千里至舊路十年歸遠似汀

洲雁相逢又背飛

後唐士和亭 明宗家人傳明宗幸宮西士和亭

宋淑景亭 玉海國史志西京內園有長春殿淑景亭

宋羣芳亭 四照亭 禊飲亭 偃蓋亭 篔簹亭 通志

俱在洛陽歸德坊宋向拱以宅獻內有此五亭見朝市圖

饜瓜亭 通志在府城南下臨伊水宋呂蒙正徵時過此

見賣瓜者心欲噉之其人偶遺一枚于地蒙正取食之後作相建亭于此以饜瓜名示不忘貧賤也

宋叢翠亭 通志在府城歐陽修有記

按歐陽記李君治亭敞其南北嚮以望見山之連者峯者岫者絡繹聯亘卑相附高相摩亭然起泮然止來而向去而背頽崖惟壑若奔若蹲若鬪若倚世所傳嵩陽三十六峯者皆可以坐而數之因取其蒼翠叢列之好遂以叢翠名亭夫居洛陽而見蒼翠叢列者西南為秦山宜陽諸峯東南為玉泉萬安半石大穴以連嵩少嵩少在百里外望之與玉泉作連峯勢不能別所謂三十六峯者而永叔謂可坐而數之又似合玉泉萬安東連嵩少以應三十六峯之數古人為文活脫不滯如此

宋探春亭 方流亭 蔭樾亭 叢玉亭 披風亭 漪風

亭 夾竹亭 兼山亭 見名園記 富鄭公園

宋流杯亭 董氏東園 華亭 錦廳 環溪王開府園

宋叢春亭 業春園 李侍郎亭 歸仁園

宋四并亭 迎翠亭 濯纓亭 觀德亭 超然亭 仁豐園

宋澆花亭 獨樂園 環翠亭 湖園

金伊川亭 通志在伊水上金司諫許古致仕居伊陽郡守

為建此亭 今伊陽隸汝州 以上洛陽

湯亭 水經注班固曰尸鄉故殷湯所都者也亦曰湯亭

按杜預謂鞏縣西南有湯亭蓋晉時地入鞏也今在偃師縣西

劉亭 左傳杜注緱氏西北有劉亭

望仙亭 通志在偃師縣仙居保昔仙人王子晉昇於緱氏

山人於此建亭望之 以上偃師

黃亭 水經注鞏城北三里有黃亭 鞏縣

漢臨平亭 水經河水又逕臨平亭北注帝王世紀光武葬

臨平亭南西望平陰者也 孟津

烟霞亭 壽安亭 通志俱在宜陽縣錦屏山元建 宜陽

漢萬歲亭 通志在登封縣西北漢武帝元封元年登太室

聞山呼萬歲者三因以名亭 楊炯少姨廟碑序餘基隱

隣仍知萬歲之亭古木摧殘尚辨三花之樹

負黍亭 涇陽亭 武林亭 俱見水經注詳都邑

唐翠翠亭 避暑錄盧鴻草堂圖余往有慶歷中摹本亦名

手精妙為賀方回取去當時在許昌得請洞霄思卜築于此山下視圖中草堂樾館枕烟磴纂翠亭等渺然若不可及盧鴻當作盧鴻乙纂翠亭別本俱作纂翠廳

唐襄荷亭

嵩山志張說有嵩山襄荷亭侍宴詩

考燕公集無嵩山字

宋奕基亭

携蒲亭

泛觴亭

元梁宜崇福宮碑三亭尚

存 芝和亭

甘泉亭

嵩書亦宋崇福宮內之亭甘泉

在崇福宮後今為白龍廟

以上登封

漢金門亭

方輿紀要漢延熹二年以誅梁冀功封尚書令

李瑋為金門亭侯即此處

舊屬宜陽今為永寧

永寧

漢潛亭

通志在新安縣漢書云灑水出潛亭北

按漢書潛作替今考其地入孟津界李濂作志時猶屬新安

唐鄭氏東亭

工部集有題鄭氏東亭詩原注在新安界鮑

云即駙馬鄭潛曜

新安

晉千秋亭

潘岳序元康二年之長安次於新安之千秋亭

按水經注千秋亭舊屬新安今入澗池互詳都邑下

澗池

水心亭

通志在嵩縣東北新店南望九臯東臨伊浦

嵩縣

館

漢平樂館

李尤平樂館銘乃興平樂宏敞麗光層樓通閣

禁闥洞房琴梁照曜朱華飾當騁武舒秘以示幽荒如榮

普覆然後來王

曹子建詩歸來宴平樂美酒斗十千

館

按平樂或名觀或名館或名苑實一地也互詳各門中

漢繭館 後漢禮儀志注桑于蠶宮手三盆于繭館 傅毅

洛都賦 桑宮繭館區制有矩后帥九嬪躬勅工女

漢祕館 賈逵傳明左氏傳國語爲之解詁五十一篇永平

中上疏獻之顯宗寫藏祕館 蔡邕傳 上書曰臣得以學

問執事祕館操管御前

漢恭館 班固典引啟恭館之金滕御東序之祕寶以流其

占注恭館宗廟金滕之所在

漢裸遊館 拾遺記靈帝初平三年遊於西園起裸遊館于

間采綠苔而被堦引渠水以繞砌周流澄澈乘船以遊 濛

宮人乘之

魏崇文館 唐六典注魏有崇文館

魏元武館 水經注魏氏起元武館於芒垂張景陽元武觀

賦所謂高樓特起竦峙若堯直亭亭以孤立延千里之清

飈也

按水經注於平縣下記元武觀則其地宜入孟津乃曰芒垂近首陽則其地又似在偃師今其地不可確指考魏志高貴鄉公初入至元武館羣臣奏請舍前殿則其地宜近古洛陽北却山上也故入洛陽

魏渭陽館 世說魏明帝爲外祖母築館於甄氏旣成自行

視謂左右曰館當以何爲名侍中繆襲曰陛下聖恩齊於

哲王罔極過於曾閔此館之興情鍾舅氏宜以渭陽爲名

晉東都館 天中記潘尼賦東都館者蓋東武楊侯之館也
俄而遷居謂余曰吾將老焉故有終焉之心而無移易之
意子且爲我賦之

後魏四夷館

伽藍記伊洛之間夾御道有四夷館

詳後都城南宅里

後魏仙人館

寒露館

伽藍記華林園大海內作蓬萊山

山上有仙人館海西南有景山殿山西有姮娥峰峰上有
寒露館並飛閣相通凌山跨谷

後魏迎風館

伽藍記河間王琛造迎風館於後園窻戶之

上列錢青鎖玉鳳銜鈴金龍吐珮素奈朱李枝條入簷伎
女樓上坐而摘食

後魏望德館

見後那縣宅

後魏儒林館

見後都城西宅里

隋學士館

大業雜記入景運門有學士館

隋四方館

六典注隋於建國門外置四方館以待四方使

客各掌其方國及互市等

按姚崇傳元宗詔徙姚崇寓四方館崇以館局華大不
敢居上曰設四方館爲官吏也使卿居之爲社稷也所
謂四方館者在唐京師非隋東都
之四方館也舊洛志誤入失實矣

唐史館

玉海今之史館卽古之東觀別置史館通籍禁門

西京則與鸞渚爲鄰東都則與鳳池相接

按兩京記門下省東有宏文館次東史館
據玉海則唐之西京東都皆有史館矣

唐防秋館

尚書故實東都項年造防秋館穿掘多得蔡邕

鴻都學所書石經後洛中人家往往有之

以上洛陽

漢緱氏仙人館

天中記元鼎間公孫卿侯神河南言見僊

人迹緱氏城可為館如緱氏城置脯棗神人宜可致

水

經注緱氏城有仙人祠

偃師

周洛汭館

春秋昭元年傳天王使劉定公

洛汭館

於洛汭劉子曰美哉禹功明德遠矣微禹吾其鯀乎吾與

子弁冕端委以治民臨諸侯禹之力也子盍亦遠繼禹功

而大庇民乎

鞏縣

古三仙館

廣開府溫泉碑嵩山三仙之館不獨擅於天池

唐樾館

盧鴻乙草堂十志樾館者蓋卽林取材基巔拓架

以加茅茨居不期逸為不至勞清談娛賓斯為尚矣

宋溫公別館

避暑錄溫公居洛遊嵩山疊石溪樂之復買

地於旁以為別館然每至不過數日卽歸有暫來還似客

歸去不成家之句嘗携邵堯夫來遊詩曰石下泉聲蔓草

深石上露濃蒼苔遍山鳥驚起飛且鳴葉墜空林人不見

康節詩曰兩轡並遊疊石溪斷崖還合與雲齊飛泉亦有

留人意肯負他年到此棲

按疊石溪在登封縣北各勝志入宜陽誤

以上登封

池

漢濯龍池

〔玉海〕薛綜注洛陽圖經曰濯龍池名故歌曰濯

龍望如海河漢渡似雷

漢靈芝池

〔水經注〕穀水枝流入石逕伏流注靈

芝九龍池魏太和中皇都遷洛陽經構宮極修理街渠

窮幽隱發石視之嘗無毀壞又石工細密非今之所擬亦

奇為精至也

漢御龍池

白石池

天泉池

〔初學記〕東漢有御龍三池

魏靈芝池

〔文帝紀〕黃初三年十一月穿靈芝池四年五月

鵝鴈集池上詔曰詩人所謂汗澤也曹詩刺共公遠君子

而近小人豈有賢智之士處於下位乎否則斯鳥何為至

至其博舉俊德茂才獨行君子以荅曹人之刺

〔晉宮閣

記〕靈芝池有鳴鶴舟指南丹

魏天淵池

〔文帝紀〕黃初五年穿天淵池

〔水經注〕天淵池

在洛陽池中有魏文帝九花叢殿

〔宋志〕魏明帝天淵

池南設流杯石溝燕羣臣

〔晉宮閣記〕天淵池有升進驪

陽飛龍射獵舟

魏芙蓉池

〔文選〕魏文帝芙蓉池作詩乘輦夜行遊道遙步

西園

魏濛汜池

〔李通志〕魏明帝于宮西鑿池以通御溝義取日

入濛汜為名

魏文學池

見洛陽志

按水經注引文士傳文帝宴諸文學甄后拜坐劉楨平觀太祖以為不敬送徒隸簿後見楨磨石問之楨對云云復為文學蓋因華林隸簿而及此事文學下接池水又東云云洛志誤以文學池為句遂生一池名謬甚

魏流杯池

幽泉池

陰流池

鳴鶴池

初學記魏在洛

有天泉

即天淵

流杯幽泉陰流鳴鶴池

晉東宮池

水經注

天淵池東流汙于洛陽縣之南池池即

故狄泉也後遂為東宮池晉中州記曰惠帝為太子出聞蝦蟇聲問人為是官蝦蟇私蝦蟇侍臣賈侑對曰在官地為官蝦蟇在私地為私蝦蟇令曰若官蝦蟇可給廩先是有識云蝦蟇當貴昔晉朝收愍懷太子於後池即是池也

晉天泉池

晉書禮志漢儀季春上巳官及百姓皆禊於東

流水上自魏以後但用三日不以上巳晉中朝公卿以下至於庶人皆禊洛水之側趙王倫篡位三日會天泉池誅張林懷帝亦會天泉池賦詩陸機云天泉池南石溝引御溝水池西積石為禊堂本水流杯飲酒亦不言曲水後元帝乃於鍾山立曲水延百僚晉起居注三月三日臨流杯池

晉池名

初學記西晉有舍利池都亭池靈芝池濛汜池潛

靈池淥池

舊洛志作淥陂池

晉張載濛汜池賦激通渠於

干池承灑洛之長川

後魏洗煩池

魏書任城王澄傳車駕還洛引見王公侍臣

之洗煩池高祖曰此池中亦有嘉魚澄曰此所謂魚在在藻有頌其首高祖曰且取王在靈沼於物魚躍

後魏流化池

北史李彪傳帝宴羣臣于流化池

後魏元武池

伽藍記華林園中山北有元武池

後魏流觴池

伽藍記華林園奈林西都堂有流觴池堂東

有扶桑海皆有石竇流於地下西通穀水東連陽渠亦與翟泉相連若旱魃為害穀水注之不竭離畢傍潤陽穀當作池之不盈至於鱗甲異品羽毛殊類濯波浮浪如似自

也

後魏昭儀寺池

伽藍記昭儀寺有池京師學徒謂之翟泉

非也隱士趙逸云此地是晉侍中石崇家池

後魏淥水池

水經注高視

當作高歡

常以避暑為淥水池一所

在金墉

後魏咸池

伽藍記光寶寺園中有一海號咸池葭芙蓉被岸

菱荷覆水青松翠竹羅生其傍京邑士子至於良辰美日

休沐告歸邀友命朋來遊此寺雲車接軫羽蓋成陰或置

酒林泉題詩花圃折藕浮瓜以為興適

後魏鴻鴈池

初學記後魏有鴻鴈池

隋積翠池

玉海隋閣散樂於東都芳華苑積翠池側又樊

子蓋陪宴積翠池

隋積潤池

大業雜記亭子宮東臨積潤池

隋曲水池

大業雜記西苑有曲水池其間有曲水殿上已

禊飲之所

隋金龍池

李通志在府城東北池南有看花臺隋李密築

唐積翠池

魏徵傳太宗宴羣臣積翠池酣樂賦詩徵賦西

漢其卒章曰終藉叔孫禮方知皇帝尊帝曰徵言未嘗不約我以禮
通鑑貞觀十一年三月庚子上宴洛陽宮西

苑之積翠池謂侍臣以隋為戒

唐凝碧池

六典東都禁苑有凝碧之池

唐九洲池

東京記東都城有九洲池在仁智殿之南歸義

門之西其池曲象東海之洲居地十頃水深丈餘魚鳥翔

派花卉羅植

國史志內園有九江池

唐杏園池

白居易楊柳枝詩黃遮金谷岸綠映杏園池

唐平津池

白居易裴侍中集賢林亭詩三江路千里五湖

天一涯何如集賢地中有平津池

宋醒酒池

名園記董氏東園有大池中為堂榜之曰含碧

水四面噴瀉池中而陰出之故朝夕如飛瀑而池不溢洛人盛醉者走登其堂輒醒故俗目曰醒酒池
以上洛陽

漢鴻池

安帝紀永初三年三月癸巳詔以鴻池假貸貧民

古蹟志

池

池

趙典傳威帝時侍中帝欲開廣鴻池典諫曰鴻池泛漑已且百頃猶復增而深之非所以崇唐虞之約已遵孝文之愛人也帝納其言而止

水經注穀水又東注鴻池陂百官志曰鴻池池名也在洛陽東二十里丞一人二百石池東西千步南北千一百步四周有塘池中又有東西橫塘水潘逕通故李尤鴻池陂銘曰鴻澤之陂聖王所規開水東注出自城池也

按鴻池在洛陽東二十里謂古洛陽也今其地當入偃師

偃師

後魏蒲池 水經注羅水西北流蒲池水注之水出南蒲陂西北流合羅水

鞏縣

古洗耳池

逸士傳巢父聞堯禪由乃洗其耳池濱樊豎方

飲其牛乃驅去之

曹子建三士贊池主是讓以水為濁

古天池

見前三仙館

北魏京兆王池

嵩山志峻極極峯西北有池鑿於北魏京兆

王太興

以上登封

東亭池

杜工部集重過鄭氏東亭詩原注在新安界詩見

藝文

新安

漢彭池

水經注漢景帝三年初徙萬戶為因崱澗之池以

目縣焉亦或謂之彭池

河南府志

卷之六十三 古蹟志

七

池 軒

唐天池 唐書太宗紀貞觀十八年十月己巳獵於天池

按方輿紀要
天池在澗池

以上澗池

軒

宋竹軒 却掃編西京一僧院後有竹林文潞公大愛之僧

具榜乞命名携歸數日思一佳名未得後半載題曰竹軒
語雖質不可破也

宋重波軒 名園記富鄭公園自其第東出探春亭登四景

堂則一園之景勝可顧覽而得南渡通津橋上方流亭望
紫筠堂而還右旋花木中有百餘步走蔭榭亭賞幽臺抵
重波軒而止

宋種竹軒 名園記獨樂園弄水種竹軒者尤小

宋翠樾軒 名園記湖園眇眇重邃猶擅花艸之盛而前據

池亭之勝者翠樾軒也
以上洛陽

齋

梁蕭齋 杜陽雜編梁武帝造寺蕭子雲飛白大書一蕭字

後李約自江南竭財買歸東洛建一小室玩之號蕭齋

宋六有齋 洛舊志尹和靖先生建取張橫渠言有教動有

法畫有為宵有得瞬有養息有存之義
以上洛陽

庵

宋花庵 李通志在府城內司馬光於廨舍東作以為休息

宋之所

宋釣魚庵

蔓艸為之爾

宋學古庵

名園記胡氏園有庵在松檜藤葛之中闢旁牖則臺之所見亦畢陳于前避松檜騫藤葛的然與人目相

會而名之曰學古庵

宋知止庵

名園記湖園內過橫池披林莽循曲徑而後得者梅臺知止庵也

以上洛陽

宋吏隱庵

宋此

李通志吏隱庵在登封縣宋龐元常隱嵩山築

宋張樞密庵

宋史張昇以樞密使請告結庵於嵩陽紫虛谷每晨起焚香讀華嚴庵中無長物布被草履而已年八

十餘卒諡曰康節

以上登封

河南府志卷之六十三終

河南府志卷之六十四

十餘卒

宋史地理志以

河南府志卷之六十四

古蹟志十

宅里一 府署坊街並載

漢迄後魏都城內宅里府署 伽藍記宮前閭闔門前御道

東有左衛府南有司徒府東有大將軍高肇宅北連

義井里府南有國子學堂國子南有宗正寺寺南有太廟

廟有護軍府南有衣冠里閭闔門前御道西有右衛府

府南有太尉府西對永康里南界昭元曹北隣御史臺南

有將作曹曹南九級府南有太社社南有凌陰里卽四

朝時藏冰處也

西陽門內御道北謂延年里劉騰宅東有太僕寺寺東有
乘黃署署東有武庫署卽魏相國司馬文王府武庫東至
闔闔門此爲宮南長秋寺亦在延年里卽晉中朝時金市
處寺北有濛汜池夏則有水冬則竭西陽門內有永康里
內復有領軍將軍元義宅掘故井得石銘云是漢太尉荀
彧宅
闔闔門內御道北有瑤光寺東去千秋門二里千秋門內
道北有西遊園中有凌雲臺魏文帝所築瑤光寺北有承
明門有金墉城魏時所築城東有洛陽小城永嘉中所築
城東北角有魏文帝百尺樓

按此所謂闔闔門者卽水經所謂漢之上西門也上所
謂宮前闔闔門者乃水經注所謂改雉門爲闔闔門也
東陽門內御道北太倉導官二署東南治粟里倉司官屬
住其內東陽門內御道南昭儀尼寺寺有池京師學徒謂
之翟泉杜預云翟泉在晉太倉西南按晉太倉在建春門
內今太倉在東陽門內此地今在太倉西南明非翟泉也
隱士趙逸云此地是晉侍中石崇家池池西南有愿會寺
中書舍人王翊宅捨爲寺寺南有宜壽里內有苞信縣令

段暉宅

按水經注辨狄泉有二處一爲洛陽縣之南池在建春
門內洛陽城東北步廣里狄泉所在不得於太倉西南
後爲東宮池一爲太倉西南在東陽門內杜元凱所謂
狄泉今無水坎方九丈六尺深三丈餘似是人功不類

泉陂注前所謂伽藍記所謂晉太倉也注後所謂伽藍記所謂冷太倉也二書互相發明

青陽門內御道北有修梵寺嵩明寺在西墻墻峻宇此屋連薨寺北有永和里漢太師董卓之宅也里南北皆有池卓之所造今猶有水冬夏不竭里中太傅錄尚書長孫稚宅尚書右僕射郭祚宅吏部尚書邢鸞宅廷尉卿元洪超宅衛尉卿許伯桃宅涼州刺史尉成興宅凡六宅皆高門華屋齋館敞麗楸槐蔭途桐楊夾植當世名爲貴里開陽門內御道東有景林寺寺西有園多饒奇果春鳥秋蟬鳴聲相續

建春門內御道南有句盾署典農署藉田署藉田南有司

農寺御道北有空地擬作東宮晉中朝時太倉處也太倉南有翟泉周迴三里卽春秋所謂王子虎晉狐偃盟於翟泉也水猶澄清洞底明靜鱗甲潛泳辨其魚鱉高祖於泉北置河南尹晉中朝時步廣里也泉西有華林園

漢迄後魏都城東宅里 伽藍記建春門外有陽渠穀水周迴繞城至門外東入渠渠南有龍華寺寺南有租場爲中朝時常滿倉高祖令爲租場天下貢賦所聚畜也陽渠北有建陽里里有土臺高三丈上作二精舍趙逸云此臺是中朝旌亭也建陽里卽中朝時白社地董威輦所居處里內有瓔珞慈善暉和通覺暉元宗聖魏昌熙平崇真因果

等十寺里內士庶二千餘戶信崇三寶衆僧利養百姓所
 供建春門外有石橋石檻四柱在道南銘云漢陽嘉四年
 將作大匠馬憲造兩頽如沒道北二柱至今猶存劉澄之
 山川古今記戴延之西征記並云晉太康元年造失之遠
 矣東一里餘至東石橋乃晉太康元年造澄之等見此橋
 銘因以建春門外橋爲太康所造也東石橋南北行橋南
 卽中朝牛馬市刑嵇康之所橋北大道西有建陽里大道
 東有綏民里里內有河間劉宣明宅宣明小有名譽通經
 史綏民里內有洛陽縣臨渠水縣門外有洛陽令楊機清
 德碑綏民里東崇義里里內有京兆人杜子休宅地形顯

敞門臨御道崇義里東有七里橋以石爲之中朝杜預之
 荊州出頓之所也七里橋東一里郭門開三道號爲三門
 離別者多云相送三門京師士子送去迎歸常在此處

按古洛陽城東地今有人偃師者茲記洛陽宅里並及
 城東以環城四面不容割裂故連而及之記謂洛陽治
 在綏民里以洛陽令楊機清德碑爲據在建春門外東
 里餘水經注辨翟泉爲洛陽縣之南池縣謂縣治乃在
 建春門內卽道元楊街之皆後魏人而所記不同如此
 豈縣治前後有遷徙與抑縣治在城門內而縣令清德
 碑在城門外與今偃師西有石橋鎮去古洛陽建春門
 可六七里乃七里橋之石橋非綏民里之石橋也偃志
 誤以七里橋爲綏民里橋遂據楊機清德碑謂古洛陽
 縣治在偃師石橋今于偃師都邑不載古洛陽縣治而
 見其說於此。又按建春門外七里橋方隸偃師至
 綏民里崇義里今尚隸洛陽故各宅事實應併入洛

東陽門外一里御道北所謂東安里也北爲租場里內有

駙馬都尉司馬洗宅濟州刺史介宣宅幽州刺史李真奴宅豫州刺史公孫驥宅御道北又有暉文里里有太保崔光宅太傅李延實宅冀州刺史李某宅秘書鄭道昭宅並豐堂掘起高門洞開趙逸云暉文里是晉馬道里延實宅是蜀主劉禪宅延實宅東有修和宅是吳王孫皓宅李某宅是晉司空張華宅東陽門外御道南所謂敬義里也里內有典虞詹宇清壯里南有招德里里內有尚書僕射游肇宅御史尉李彪宅七兵書崔林宅幽州刺史常景宅司農張倫宅

清陽門外御道北有孝敬里爲廣平武穆宅堂宇宏美林

木蕭森清陽門外三里御道南有景寧里太保司徒公楊椿宅在此里遂分宅爲寺因以名之清陽門外三里御道北有孝義里里西北角有蘇秦塚里東卽洛陽小市北有車騎將軍張景仁宅

漢迄後魏都城南宅里 伽藍記宣陽門外一里御道東有景明寺寺西大統寺所謂利民里南有三公令史高顯略宅人謂此地是蘇秦舊宅景明南一里有秦太上公二寺亦號雙女寺俱鄰洛水寺東有靈臺臺東辟雍宣陽門外四里至洛水上作浮橋所謂永橋也南北兩岸有華表高二十丈上作鳳凰似欲冲天勢永橋以南圓邱以北伊洛

之間夾御道有四夷館道東有四館一名金陵二名燕然
三名扶桑四名崦嵫道西有四里一曰歸正二曰歸德三
曰慕化四曰慕義吳人投國者處金陵館三年後賜宅歸
正里景明初築偽齊建安蕭寶寅宅於歸正里正光四年
築西豐侯蕭正德宅於歸正里北夷來附者處燕然館三
年以後賜宅歸德里正光年那肱來朝處之燕然館賜宅
歸德里北夷酋長遣子入侍者常秋來春去避中國熱時
人謂之鴈臣東夷來附者處扶桑館賜宅慕化里西夷來
附者處之崦嵫館賜宅慕義里自葱嶺已西至於大秦百
國千城莫不欵附商胡販客日奔塞下所盡天地之區矣

樂中國土風因而宅者不可勝數是以附化之民萬有餘
家門巷修整闔闔填列青槐蔭陌綠柳垂庭天下難得之
貨咸悉在焉別立市於洛水南號曰四通市民間爲永橋
市永橋南道東有白象獅子二坊

開陽門外三里御道東有漢國子學堂堂前有各種字石
經二十五碑表裏刻之寫春秋尚書二部作篆科斗隸三
種字漢右中郎蔡邕筆之遺跡也猶有十八碑餘皆殘毀
復有石碑四十八枚亦表裏隸書寫周易尚書公羊禮記
四部讚學碑一所並在堂前魏文帝作典論六碑至太和
十七年猶有四高祖題爲勸學里里有大覺三寶寧遠三

寺武定四年大將軍遷石經於鄴周廻有園珍果出焉勸
學里東有延賢里有尚書令王肅宅

津陽門外三里御道西爲高陽王雍宅雍爲爾朱榮所害
捨宅爲寺高陽宅北有甘和里

漢迄後魏都城西宅里

伽藍記西明門外一里御道北有

太傅清河王懌宅第宅豐大踰於高陽西北有樓曰極京
師樓下有儒林館退賓堂形製並如清暑殿土山釣池冠
於當世斜峯入牖曲沼環堂樹響飛嚶堦叢花藥

西陽門外一里御道南有城陽王徽宅西陽門外三里御
道南有白馬寺西陽門外御道北有寶光寺西法雲寺

寺北有侍中尚書臨淮王彧宅西陽門外四里御道南有
洛陽大市周廻八里市東南有皇女臺漢大將軍梁冀所
造猶高五尺餘景明比丘道恒立靈仙於其上臺西有河
陽縣臺中有侍中侯剛宅市西北有土山魚池亦冀之所
造卽漢書所謂採土築山十里九坂以象二嶠者市東有
通商達貨二里市南有調音樂肆二里市西有退酤治觴
二里市北有慈孝奉終二里別有準財金肆二里富人在
焉凡此十里多工商貨殖之民千金比屋層樓對出重門
啟扇閣道交通迭相臨望準財里內有京兆人韋英宅尚
書右僕射元稹聞里內頗有怪異遂改準財爲齊諧里自

退酤以西張方溝水東南臨洛水北達却山其間東西二里南北十五里並名爲壽邱里皇宗所立也民間號爲王子坊帝族王侯外戚公主爭修園宅互相誇競崇門豐室洞戶連房飛館生風重樓起霧有河間王琛宅又有東平王略宅

閶闔門外御道南有融覺寺寺西一里許有大覺寺爲廣平王環宅捨爲寺寺東永明寺西有宜牛里里內有陳留王景浩宅侍中安定公胡元吉宅閶闔門外七里爲長分橋亦曰張方橋民間語譌爲張夫人橋

漢迄後魏都城北宅里 [伽藍記大夏門御道西有闕武場

歲終農隙甲士習戰千乘萬騎常在於此中朝時宣武場在大夏門東北今爲光風園苜蓿在焉

廣莫門外一里御道所謂永平里也卽漢太上王廣處遷京之初創居此里地形高顯下臨城闕城東北有上高里殷之頑民所居處也高祖改名聞義里遷京之始朝士住其中迭相譏刺竟皆去之唯冠軍將軍郭文遠遊憩其中堂宇園林匹於邦君里有燉煌人宋雲宅與惠生取西域經凡得一百七十部

京師東西二十里南北十五里戶十萬六千餘廟社宮室府曹以外方三百步爲一里里開四門置里正一人吏四

人門士八人合有二百二十里

隋都城內外宅里街坊大業雜記東都大城西拒王城東

越澗澗南跨洛川北踰谷水宮城東西五里二百步南北

七里城南東西各兩重北三重

南臨洛水開大道對端門街一名天津街濶一百步道傍

植櫻桃石榴兩行自端門至建國門南北九里四望成行

人由其下中為御道通泉流渠映帶其間端門即宮南正

門大街直南二十里正當龍門

出端門百步有黃道渠上有黃道橋三道過渠二百步至

洛水有天津浮橋過洛二百步又疏洛水為重津渠有浮

橋時開闢以通樓船入苑重津南百餘步有大隄南有民

坊各周四里開四門臨大街門並為重樓飾以丹粉洛南

有九十六坊洛北有三十坊大街小陌縱橫相對

自重津南行盡各坊有建國門即羅城南正門也門南二

里有甘泉渠疏洛入伊渠上有通仙橋五道時人亦謂之

五橋橋南北有華表長四丈各高百餘尺建國門西二里

有白虎門西二里至苑城傍城行三里有天經宮南二里

有仙都宮並置先帝廟堂建國門東五里有長夏門南二

里至丹水渠南五里至伊水東北流十餘里入洛

端門西一里有右掖門門南過黃道渠橋南道西有右侯

衛府出右掖門門傍城西二里有龍天道場南臨石瀉口
卽煬帝門師濟闍黎所居石瀉東西二百餘步濶五十餘
步深八尺並用青大石長七八尺厚一尺自上至下積三
重並用大鐵爲細腰互相鈎牽亦非常牢固正當瀉口三
十步初造瀉之時鑿地得大窖容千斛許於是填塞瀉成
不過一年卽破碎土令濟闍黎咒之後更修補得立二年
闍黎亡還復毀破前後計用四十萬工以瀉三城池水下
黃道渠入洛

端門東有左掖門南道左有左侯衛府左掖門東二里有
承福門卽東城南門南洛水有趵突橋通翻經道場

經本從外國來用貝多樹葉形似枇杷葉而厚大橫作行
書約經多少綴其一邊今呼爲梵夾道場北府道術坊並
是梵咒有道術人居之向有百餘家東城東有宣仁門臨
大道大小與天津街相似東行盡六坊有上春門外夾道
南北有東西道諸郡邸百餘所每年朝集使停止之處并
新戶坊東至雙槐樹三里

宮城正門曰則天門南去端門五百步則天門東行二百
步有興教門門一里有重光門卽東光正門門東二百步
有泰和門並重觀門內卽左右藏左藏有庫門六重重二
十五間間一十七架總一百五十間右藏屋兩重總四十

間屋大小如左藏

出則天門南橫街直東七百步有東太陽門東即東城門東街北行三里有含嘉門門北即含嘉城城北德猷門出含嘉西有圓壁門西有圓壁城城正南有曜儀門南即曜儀城城南元武門門內即宮

出則天門南橫街直西七百步有西太陽門出門道西南行第一院齊王宅第二院燕王宅第三院陳王宅第四院代王宅第五院越王宅宅西拒周王古城城西即入苑則天門南八十步過橫街道西有西朝堂西連內史省省西連謁者臺臺連右翊衛府府西抵右掖門街街西有輦

庫庫西即西馬坊坊西抵西城西朝堂第二街北壁第即右驍衛府府西連右禦衛府府西抵右掖門街街西有子羅倉倉有鹽二十萬石子羅倉西有粳米六十餘窖窖別受八千石窖西至西城西朝堂南第三街第一御史臺臺西連秘書省省西連尚食庫庫西連右監門府府西連長秋監監西抵右掖門街街西即掌醢署署西連良醞署署西至粳米窖坊

則天門南過橫街道東有東朝堂東連門下省省東殿內省省東連左掖衛府府東即抵左掖門街街東即西錢坊坊東連東錢坊東朝堂南第二街第一左驍衛府府東

左連

備身府府東左武衛府府東連左屯衛府府東連左禦衛
府府東抵左掖門街街東卽少府監監東卽城東朝堂南
第三街第一司隸臺臺東連光祿寺寺東連左監門府府
東連大府寺寺東抵左掖門街街東卽少府監連南監監
東至城
出東大陽門街北道東第一街有鴻臚寺寺東有司農寺
寺東連太常寺寺東抵城第二街卽宣仁門大道大道北
卽尚書省第三街將作監監東連太僕寺寺東至城第四
街有衛尉寺寺東連都水監監東宗正寺寺東連大理寺
寺東抵城

則天門東二百步有興教門門北三十步有會昌門門
二百步有章善門入內尚食進食尚藥進藥內尚進物皆
由此門會昌門內道左有內殿內省少府內監內尚光祿
內厨道右門下內省左六衛內府左監門內府入章善門
橫街東百二十步有重潤門東有東宮
則天門西一百步有光政門門北三十步有景運門門北
二百步有明福門入內宮命婦入朝學士進書皆由此門
入景運門入道左有內史內省秘書內省學士館右監門
內府右六衛內府鷹坊內甲庫道右命婦朝堂惠日法雲
二道場通真玉清二元壇接西馬坊

河南郡在宣範里西北去宮城七里河南縣在政化里去宮城八里在天津街西洛陽縣在德茂里宣仁門道北西去宮城六里

按漢以後都城宅里依伽藍記分段總載隋唐後都城宅里依大業雜記分段總載但明位置不詳事實其有事實可記者另標各宅里名參以他書所見併詳於後餘無事實可記已見總載中後不更及

府志卷之六十五

河南府志卷之六十五

古蹟志十一

宅里二

周蘇秦宅

伽藍記利民里有三公令史高顯略宅每於夜

見赤光行於堂前如此者非一向光明所掘地丈餘得黃金千斤銘云蘇秦家金得者為吾造功德顯略遂造招福寺世人謂此地是蘇秦舊宅按蘇秦時未有佛法功德者不必是寺應是碑銘之類頌其聲跡也

按李濂通志以宅在仁和里舊洛志以為在太平莊嘗有人得古碑所載皆蘇家事云

漢鮑永宅

鮑永傳永至懷說更始河內大守開城而降帝

大喜賜永洛陽商里宅固辭不受

按漢書注以商里即上商里在洛陽東北殷頑民所居伽藍記以上商為上高

漢劉昆宅

儒林傳昆以宏農太守入授皇太子及諸王小

侯五十餘人建武三十年呂老乞骸骨詔賜洛陽第舍呂千石祿終其身

漢竇氏邸第

竇融傳竇氏一公兩侯三公王四二千石皆

相與並時自祖及孫官府邸第相望京邑奴婢呂千數於親戚功臣中莫與為比

漢梁冀宅

梁冀傳冀大志第舍妻壽亦對街為宅殫極上

木互相誇競堂寢皆有陰陽奧室連房洞戶柱壁雕鏤

呂銅漆窻牖皆有綺疎青瑣圖呂雲氣仙靈臺閣周通更相臨望飛梁石磴陵跨水道金玉珠璣異方珍怪充積臧室

漢李膺宅

名勝志宅在延年里元禮風格秀整高自標持

後進有升其堂皆以為登龍門

漢董卓宅

伽藍記青陽門內永和里有董卓宅掘此地者

輒得金玉寶玩之物刑鸞家常掘丹砂及錢十萬銘云董卓師之物後卓夜中隨鸞索此物鸞不與之經年鸞遂卒矣

按刑鸞魏書作刑鸞本傳云鸞自宿豫大捷及平懸瓠志行修正不復以財賄為懷戎資軍實絲毫無犯遷殿

中尚書加撫軍將軍延昌三年暴疾卒以密之清正而暴卒是鬼物索財之所由附會也

魏曹爽宅 水經注永寧寺地是曹爽故宅經始之日於寺

院西南隅得爽窟室下入地可丈許地壁悉累方石砌之

石作細密都無所毀其石悉入法用自非曹爽庸匠亦難

復制此桓氏有言曹子丹生此脉續信矣

晉石崇宅 伽藍記東陽門內有晉侍中石崇家池池南有

綠珠樓經過者想見綠珠之容

按綠珠樓據通志在
金谷園互詳園圃門

晉賈充宅 水經注宣武場西故賈充宅地

晉潘岳宅 李通志在府城南七里岳中牟人奉母卜居

水名曰西宅內有園池竹木嘗作閑居賦

晉二陸瓦屋 世說蔡司徒在洛見陸機兄弟住叅佐廨中

三間瓦屋士龍住東頭士衡住西頭

晉西園第 陸雲傳雲拜吳王晏郎中令晏於西園大營第

室雲上書曰世祖武皇帝屢發明詔厚戒豐奢清河王昔

起墓宅時手詔追述先帝節儉之教懇切之旨形于四海

清河王毀壞成宅以奉詔命今與國家協崇大化追闡前

蹤者實在殿下先敦素樸然後上厭帝心下允時望

晉裴楷宅 裴楷別傳楷營新宅基宇甚麗當移住與其從

兄衍共游行牀帳儼然櫛軒疎朗兄心願之而口不言楷

心知其意便使兄位

晉荀勗宅 〔伽藍記〕後魏段暉宅地下常聞鐘聲時見五色

光明照於堂宇暉甚異之遂掘光得金像一軀有二菩薩

上銘云晉荀勗造暉遂捨宅為寺時人咸云荀勗舊宅

晉白社 〔水經注〕馬市北白社故里昔孫子荆會董威輦於

白社以同載為榮故有威輦圖 〔晉書〕董京字威輦初與

隴西計吏俱至洛陽被髮行吟常宿白社中時乞於市得

殘碎繒絮結以自覆孫楚時為著作郎數就社中與語勸

之仕京以詩答之遂遁去

晉步廣里 〔水經注〕晉永嘉元年洛陽東北步廣里地陷有

二鵝出蒼色者飛翔冲天白色者止焉 〔玉海〕洛陽記百

郡邸在洛城中東城下步廣里所以通奏報待朝宿

晉永安里 〔晉書〕劉宏傳少家洛陽與武帝同居永安里又

同年共研席

後魏高陽王雍宅 〔伽藍記〕津陽門外有高陽王雍宅正光

中雍為丞相給羽葆鼓吹虎賁班劍百人貴極人臣富兼

山海居止第宅匹於帝宮白殿丹楹窈窕連亘飛簷峻宇

轆轤周通僮僕六千妓女五百隨珠照日羅衣從風自漢

晉以來諸王豪俊未有也一食必以數萬錢為限陳留侯

李崇謂人曰高陽一食敵我千日崇亦富而性儉恡食止

裴薤崇客李元祐語人曰李令公一食十八種人間其故
元祐曰二韭一十八間者大笑雍有美人徐月華嫁將軍
原士康宅近青陽門善箜篌聽者成市徐語士康云王有
二姬一修容能爲綠水歌一艷姿善么鳳舞

後魏城陽王徽宅

伽藍記西陽門外有城陽王徽宅莊帝

謀殺爾朱榮徽計以生太子爲辭榮入朝因斃之及爾朱
兆擒莊帝徽投前洛陽令寇祖仁以有舊恩往投之齋金
一百斤馬五十匹祖仁利其財斬送兆兆忽夢徽云我有
金二百斤馬一百匹在祖仁家卿可取之兆覺思城陽位
望隆重未聞清貧常入其家採跡無金此夢或真曉掩祖

仁徵金馬祖仁云實得金一百斤馬五十疋兆依夢徵之
祖仁諸房素有金三十斤馬三十疋盡送兆猶不滿數兆
乃發怒捉祖仁懸首高樹大石墜足鞭捶之以及於死

後魏臨淮王彧宅

伽藍記西陽門外有臨淮王彧宅彧性

愛山林又重賓客至於春風扇柳花樹如錦晨食南館夜
遊後園僚案成羣俊民滿席絲桐發響羽觴流行詩賦並
陳清言乍起莫不領其元奧忘其褊恠荊州秀才張裴裳
有句云異林花共色別樹鳥同聲彧以蛟龍錦賜之亦有
得緋紉緋綾者唯河東裴子明詩不工罰酒一石八斗而

醉人譬山濤

後魏河間王琛宅

伽藍記壽邱里有河間王琛宅最爲豪

侈與高陽爭行造文栢堂形如徽音殿置玉井金罐以金五色續爲繩妓女三百人盡國色有婢朝雲善吹箎能爲團扇歌壘上聲琛爲秦州刺史諸羌外叛琛令朝雲假爲貧嫗吹箎而乞諸羌聞之皆流涕相率歸降秦民語曰快馬健兒不如老嫗吹箎又得波斯國千里馬號追風赤次七百里馬十餘疋皆有名字銀爲槽金爲鑲環常語人云石崇乃是庶姓猶能雉頭狐掖畫茆雕薪况我大魏天王不爲華侈

後魏東平王略宅

伽藍記壽邱里有東平王略宅元義專

政略與兄謀起義兵不就逃命江左蕭衍聞略名甚重之除宣城太守爲政清肅有治聲孝昌初明帝宥吳人江革請略歸國江革者蕭衍之大將也蕭衍謂曰朕寧失江革不得無王略略曰臣遭家禍難白骨未收乞還本朝收錄存沒因卽悲泣衍哀而遣之

後魏刑巒宅

魏書刑巒傳高祖因行藥至司空府南見巒

宅遣使謂巒曰朝行藥至此見卿宅乃住東望德館情有依然巒對曰陛下移構中京方建無窮之業臣意在與魏昇降寧容不務永年之宅高祖謂司空穆亮僕射李冲曰巒之此言其意不小

後魏李延實宅

伽藍記暉文里有太傅李延實宅延實者

莊帝舅也永安中除青州刺史帝謂曰懷甄之俗世號難

治舅宜副朝廷所委時黃門侍郎楊寬在側不曉懷甄之

義私問舍人温子昇曰青州之俗太守初入境皆懷甄印

首以美其意及其代下還家以甄擊之是以京師語人曰

獄中無繫囚舍內無青州

後魏張倫宅

伽藍記招德里有司農張倫宅倫最為豪侈

齋宇光麗服玩精奇車馬出入逾於邦君園林山池之美

諸王莫及倫造景陽山有若自然其中重巖複嶺嵌崿相

屬深谿洞壑邈逶連接高林巨樹日月蔽虧懸葛垂蘿風

煙出入崎嶇石路似壅而通崢嶸澗道盤紆復直是以山

情野興之士遊以忘歸天水人姜質志性踈誕麻衣葛巾

有逸民之操見偏愛之如不能已遂造亭山賦傳於世

按亭山賦造語清新已開唐人賦體雖字多闕畧尚可披尋賦曰今平童者昔先民之重由樸由純然純樸之體與造化而津梁濛上之容柱下之史悟無為以明心託自然以圖治輒以山水為富不以章甫為貴任性浮沈若淡兮無味今司農張良實踵其人巨量煥於物表天矯洞達其真青松未勝其潔白玉不比其稱心托空而棲有情入古以如心既不專流宕又不偏華尚卜居動靜之間不以山水為忘庭起半邱半壑聽以目達心想進不為身榮退不為隱放爾乃决石通泉拔嶺簷前高與危雲等並危與典棟相連下天津之高霧納滄海之遠煙繼列之狀如古崩剝之勢似千年若乃絕頂懸波踏險踈跬泉未徐如浪峭山石不高復危多五尋百援十步千過則知巫山弗及未審蓬萊如何其中煙花霧草或傾或頽霜幹風枝半聳半垂玉蕊金莖散

滿皆輝然綺目之色列鼻之馨既共綠春等茂復與白雪齊清或言神明之骨陰陽之精天地未覺生此人鬼焉職其中羽徒分泊色雜蒼黃綠頭紫頰好翠連芳白鷗生于異縣丹足出于他鄉皆遠來以臻此藉水木以翔翔不意春於沙漠遂忘秋於高陽非斯人之感至伺候鳥之迷方豈不俗之所務入有神怪之異趣能造者其必詩敢往者無不賦或就堯封之地或入多雲之處

口嶺與梅岑隨春之所口遠為神仙所賞近為朝士所知求解脫于服佩務參次于山陲歌方丈不足以妙詠此處口多奇嗣宗聞之動魄叔夜聽此驚魂恨不能鑽地出一醉此山門別有王孫公子遯遁容儀思山念水命駕相隨峰岑愛曲值石陵歛庭為仁智之由故能種此石山森列兮草木長有兮風煙孤松既能却老半石亦可留年若不坐卧兮於其側春夏兮其遊陟白骨兮徒自朽方寸何所憶

後魏楊椿宅

伽藍記景寧里有太保司徒公楊椿宅椿弟

慎冀州刺史慎弟津司空四世同居一門三從朝貴義居

未之有也普泰中為爾朱世隆所誅後捨宅為建中寺

後魏張景仁宅

伽藍記孝義里有車騎將軍張景仁宅景

仁會稽山陰人也正光年初從蕭保夤歸化拜羽林監賜

宅城南歸正里民間號為吳人坊南來投化者多居其內

後魏王肅宅

伽藍記延賢里有尚書令王肅宅肅博識舊

事高祖甚重之常呼王生延賢之名肅立之肅自江南入

中國不食羊肉及酪漿等常飯鯽魚羹渴飲茗一飲一斗

號為漏卮高祖謂曰羊肉何如魚羹酪漿何如茗飲對曰

羊比齊魯大邦魚比邾莒小國唯茗不中與酪作奴因此

號茗飲為酪奴

後魏景皓宅

〔伽藍記〕宜牛里有陳留王景皓宅景皓尤善元言道家之業遂捨半宅安置僧徒有孟仲暉者來與沙門論議號元宗先生造人中俠紵像一軀置皓前廳須臾彌寶座永安中像每夜行遶座跡隱地成文後忽自去莫知所之

後魏郭文遠宅

〔伽藍記〕聞義里有冠軍將軍郭文遠宅堂宇園林匹於邦君時隴西李元謙能雙聲語常經文遠宅前過見其闕閤華美乃曰是誰第宅值婢春風出曰郭冠軍家元謙曰此婢雙聲春風曰停奴慢罵元謙服婢之能於是京邑翕然傳之

後魏劉宣明宅

〔伽藍記〕綏民里內有河間劉宣明宅神龜年中以直諫忤旨斬於市訖目不瞑尸行百步時人謂以枉死宣明少有名譽精通經史危行及於誅也

後魏杜子休宅

〔伽藍記〕有隱士趙逸者晉武時人至京師見子休宅嘆息曰此宅中朝時太康寺也王濬平吳後始立有三層浮圖用甄爲之指子休園中曰此是故處子休掘而驗之果得甄數十萬兼有石銘記年月爲晉王濬造乃服逸言好事者遂尋問晉朝京民何如今日逸曰晉時民少於今日王侯第與今日相侔又云自永嘉以來二百餘年建國稱王者十六君皆目見其事國滅之後觀其史

書皆非實錄莫不推過於人引善自向人皆貴遠賤近以爲信然當今之人亦生愚死智惑已甚矣問其故逸曰生時庸人及死也碑文墓誌必窮天地之大德盡生民之能事爲君共堯舜連衡爲臣與伊臯等跡牧民之臣浮虎慕其清塵執法之吏埋輪謝其梗直當時構文之士慚逸此言汝南王問何所服餌以致長年逸云吾不聞養生自然長壽郭璞嘗爲吾筮云壽五百歲今始餘半後遁去莫知所在

後魏韋英宅

〔伽藍記〕準財里內有京兆人韋英宅英卒妻梁氏更納向子集爲夫仍居英宅英忽來歸乘馬將數人

至庭前呼曰阿梁卿忘我也子集驚張弓射之應箭而倒變爲桃人馬爲茆馬從者爲蒲人

後魏中甘里

〔伽藍記〕城南有中甘里里內潁川荀子文幼而聰辨潘崇和講服氏春秋於城東昭義里子文就和受道趙郡子李曰荀生何爲佳城南以南有四夷盟譏之對曰國陽勝地卿何怪也若言川澗伊洛崢嶸語其舊事靈臺石經若論人物有我無卿予無以對崇和曰汝潁之士利如錐燕趙之士鈍如錘

後魏通商達貨二里

〔伽藍記〕里內之人盡皆工巧屠販爲生資財巨萬有劉寶者最爲富室州郡都會之處皆立一

宅各養馬一匹海內之貨咸萃其庭產匹銅山家藏金穴宅宇踰制樓觀出雲車馬服飾擬于王者

後魏調音樂肆二里

〔伽藍記〕里內之人絲竹謳歌天下妙

伎出焉有田僧超者善吹箏能爲壯士歌項羽吟征西將軍崔延伯甚愛之正光末万俟醜奴寇涇岐延伯出師於洛陽城西張方橋卽漢之夕陽亭也時公卿祖道車騎成列延伯危冠長劍羅武於前僧超吹壯士笛歌曲於後聞之者懦夫成勇劔客思奮至軍中常令僧超爲壯士聲甲冑之士踴躍延伯單馬入陣傍若無人勇冠三軍威振戎整二年之間獻捷相繼醜奴募善射者中僧超死延伯悲

惜哀動左右後亦爲流矢所中五萬之師一時潰散

後魏退酤治觴二里

〔伽藍記〕里內之人多醞酒爲業河東

人劉白墮善釀酒炎暑赫羲巨甕貯酒曝於日中經旬不動飲之經月不醒朝貴出郡登藩餉饋千里以其遠至號曰鶴觴亦名騎驢酒青州刺史毛鴻賓齋酒之番路逢劫盜飲之卽醉皆被擒因爲擒奸酒游俠語曰不畏張弓拔刀唯畏白墮春醪

後魏慈孝奉終二里

〔伽藍記〕里內人以賣棺槨爲業賃輜

車爲事有挽歌孫巖娶妻三年不脫衣而卧巖怪之伺其睡陰解其衣有三毛長三尺似野狐尾巖懼而出之妻臨

去將刀截巖髮而走鄰人追之變成一狐追之不得其後京邑被截髮者一百三十餘人初變婦人衣服靚粧行於道路人見而悅之近者被截髮當時有婦人着綵衣行者人皆指為狐魅

後魏上高里 伽藍記洛陽城東北有上高里殷之頑民所

居遷京之始朝士住其中迭相譏刺竟皆去之唯有造瓦者止其內京師瓦器出焉世人歌曰洛城東北上高里殷之頑民昔所止今日百姓造甕子人皆棄去住者耻

隋齊王暕宅 隋書齊王暕傳樂平公主嘗奏帝言柳氏女美者帝未有所答久之主復以柳氏進暕納之帝不悅

疎於東都營第大門無故而崩聽事楸中折識者以為不祥

唐五王子宅 唐書讓皇帝憲傳初睿宗五子列第東都積善坊號五王子宅及賜第上都隆慶坊亦號五王子宅

按洛陽舊志載唐高祖舊宅有枯柳復生攷高祖龍潛舊邸在長安即興慶宮洛志牽入者蓋因五王子宅而誤也五王子宅先在東都又在長安隆慶坊據唐書先天後盡以隆慶舊邸為興慶宮洛志見隆慶有五王子宅又有高祖舊邸因併牽入洛陽不知隆慶坊之五王子宅實非洛陽之五王子宅洛固無高祖舊宅也

唐魏王泰宅 唐書公主列傳東都魏王泰故第東西盡一坊瀦沼三百畝

唐長寧公主宅 公主列傳長寧公主下嫁楊慎交造第東

都第成府財幾竭東都廢永昌縣主丐其治爲府以地瀕
洛築鄣之崇臺蜚觀相連屬無慮費二十萬又丐得魏王
泰故第亭閣華詭埒西京

唐甄權宅 玉海太宗貞觀十一年幸洛陽高年甄權宅權
年一百三歲拜朝散大夫賜几杖

唐宗楚客宅 朝野僉載宗楚客造一宅新成皆是文柏爲
梁沉香和紅粉以泥塗壁開門則香氣蓬勃磨文石爲階
砌及地著吉莫靴者行則仰仆楚客被逮昌王推得贓萬
餘兄弟配流太平公主就其宅看歎曰觀其行坐處吾輩
虛生浪死

唐狄仁傑宅 狄仁傑傳后幸三陽宮王公皆從獨賜仁傑
第一區眷禮卓異時無輩者

唐張說宅 淵鑑類函浮圖泓與張說市宅戒無穿西北隅
他日怪氣索然視西北隅果有三坎皆深丈餘驚曰公富
貴一世而已諸子將不終說將平之泓曰客土無氣與地
脉不連譬身有瘡痛補以他肉無益也後子均埒爲安祿
山委任克復後埒遠流均賜死

唐宋璟宅 宋璟傳璟致仕仍賜全祿退居洛乘輿東幸璟
謁道左詔榮王勞問別遣使賜藥餌

唐張嘉貞宅 張嘉貞傳洛陽王簿王鈞者爲嘉貞繕第會

以職聞有詔杖之朝堂嘉貞畏巖染促有司速斃以滅言

唐張宏靖宅 張宏靖傳宏靖家聚書畫俸秘府第在東都

思順里盛麗甲當時歷五世無所增葺時號三相張家云

按三相謂嘉貞延賞宏靖也史稱張氏三世宰相為開元賢輔佐然器有所窮嘉貞窮於俗延賞窮於伎宏靖窮於權借哉

唐裴寬宅 裴寬傳寬兄弟八人皆擢明經任臺省州刺史

雅性友愛於東都治第八院相對甥姪亦有名稱常擊鼓會飯

唐崔日用宅 洛舊志在積善坊日用則天時為洛陽令元

宗微時嘗至其宅日用為設饌未熟元宗因寢庭前藤花

初開日用忽見一巨黃蛇食藤花驚不敢近逡巡不見元

宗覺曰大奇我饑甚夢中食藤花滋味分明記得已得餘

飽為啟聖之驗

唐張易之宅 朝野僉載易之初造大堂夜有鬼書其壁曰

能得幾時削去復書經半載籍没入官

唐楊憑宅 見後履道里

唐喬處士宅 平泉記在洛陽城南三十里後李德裕居之

唐牛僧孺宅 牛僧孺傳開成初表解劇鎮以檢校司空為

東都留守僧孺泊第洛之歸仁里多致嘉石美木與賓客

相娛樂 白居易太湖石記丞相竒章公嗜石于此物獨

不謙讓東第南墅列而置之以甲乙丙丁品之各刻於石
陰曰牛氏石甲之上丙之中乙之下

按舊唐書白居易傳杭州得天竺石一華亭鶴二蘇州
得太湖石五折腰菱俱置于里第池上又白居易寄牛
相公詩云華亭鶴不去天
竺石相隨二人蓋石友也

唐盧仝宅 李通志在府城內全號玉川子韓愈詩玉川先
生洛城裏破屋數間而已矣

唐履道里 舊唐書白居易傳居易罷杭州歸洛陽於履道
里得散騎常侍楊憑宅竹木池館有林泉之致因為池上
篇曰都城風土水木之勝在東南偏東南之勝在履道里
里之勝在西北隅西開北垣第一第即白氏叟樂天退老

之地

唐集賢里 唐書裴度傳時閹豎擅威縉紳道喪度不復有
經濟志乃治第東都集賢里

唐樂和里 李景讓傳景讓宅東都樂和里世稱清德者號
樂和李公云

唐尊賢里 碧鼓錄宋開府璟雖耿介不羣亦深好色
善羯鼓東都留守鄭叔則祖母即開府之女今尊賢里鄭
氏第有小樓即宋夫人習鼓之所也

唐金谷里 沈亞之文貞元中洛陽金谷里有女子葉學歌
於柳恭之下

後唐羅紹威宅

〔五代史〕羅紹威前唐時常建第洛陽福善里莊宗同光中始賜明宗梁租庸使趙巖宅雖華以趨內遠乃召紹威子周敬易其第後明宗即位一日夢中見一人儀形瓌秀若素識者上夢中曰此得非前宅主羅氏乎乃寤訪其子孫左右對曰周敬現列明宗召至類符夢中所見上謂侍臣曰朕不欲使大勲之後久無土地因授左馮翊非承家為善何以致此

五代敦化里

〔張策傳〕少聰悟好學通章句父同居洛陽敦

化里

五代勲德里

〔宏簡錄〕李穀祖父皆居洛經黃巢亂徙潁州

既貴訪得舊址求歸周祖詔改所居鄉為賢相鄉里為勲德里

宋趙普宅

〔淵鑑類函〕趙普將營西宅遣人於秦隴市良材

以萬數及宅成時為西京留守已病矣詔詣闕將行乘小車一游第中遂如京師竟至捐館不復再來矣

〔李通志〕普宅在府城內有園詔將作大匠營治制作侔禁省

宋曹彬宅

〔李通志〕在府城內彬真定人為宋將退居洛陽

所居僅庇風雨處之怡然

宋呂蒙正宅

〔名勝志〕蒙正宅在南州坊即張觀文宅也真

宗祀汾陰過洛文穆尚能迎謁及回鑾已病篤帝親幸其

宅問卿諸子孰可用對曰臣諸子皆豚犬有姪夷簡宰相才也相傳宅中御坐處後歸張氏亦不敢燕寢云

宋張齊賢宅 名勝志張齊賢宅即裴晉公午橋莊也其詩

云午橋今得晉公廬水竹烟花興有餘師亮白頭心已足四登兩府九尚書師亮齊賢字

宋呂公著宅 名勝志呂公著宅在白獅子巷張知白宅西

宋范文正公宅 玉海文正子弟以公有退志乘間請治第

洛陽樹園圃以為遊逸之地公曰人苟有道義之樂形骸可外况居室哉

宋文彥博宅 李通志在府城內彥博五為河南尹愛其山

川風俗乃卜居焉

宋富鄭公宅 名勝志鄭公宅與康節宅相近俱在天津橋

南康節和富公詩道堂閒話儘多時塵外杯觴不浪飛初

上小車人已識醉和風雨夜深歸

宋邵康節宅 淵鑑類函宋嘉祐七年王宣徽拱辰尹洛就

天宮寺西橋五代節度使安審宅故基以邵崇韜廢屋餘材為屋三十間請邵康節遷居之富鄭公又命其客孟約

為買對宅一園有水竹花木之勝 名勝志康節自命其

所居為安樂窩時遊城中士大夫識其車音爭相迎候或留信宿乃去好事者別作屋以候其至

宋司馬光宅 洛舊志在洛水南光居洛十五年成資治通

鑑以進初遷入時步行見牆外埋竹簽將以防盜也公曰

吾篋中所有幾何盜亦人也何可以此為防命亟去之

宋郭從義宅 淵鑑類函郭從義鎮河陽於洛中造大第皆

以香栢為柱文梓為梁花石甃地引水築山第成費白金

五千錠次年被召還都暮抵其第秉燭周覽時朝會有期

侵晨而出行至東都卒家人不能居

按從義宅有竹節洞匠師蔡奇造通貫明窈人以為神亦異事也

以上洛陽

晉阮嗣宗故居 水經注穀水又東南轉屈而東注謂之阮

曲云阮嗣宗之故居

按阮曲在古洛陽城東與鴻池陂相近今其地入偃師通志記阮藉宅於府城東南誤

唐宋之間故居 杜甫詩宋公舊池館零落首陽阿

唐杜甫土樓故居 杜甫全集有琵琶孟倉曹將書問土樓故

居詩又贈韋河南詩尸鄉餘土室誰話祝雞翁自注甫故

廬在偃師

按工部曾祖杜依藝為鞏令後家於鞏故舊唐書以為在鞏不言偃師而偃師得有舊廬者蓋當陽侯墓在偃師故偃有守墓舊居且古人居不一地即工部亦嘗稱杜陵野老浣花翁皆隨地自號焉爾

以偃師

漢三田故里 續齊諧記田真兄弟三人共議分財生貲皆

平均惟堂前一株荆樹共議欲破三片明日就截之其樹即

枯死狀如火燃真往見之大驚謂諸弟曰樹本同株聞將

分砍所以顛頓是人不如木也因悲不自勝不復解樹樹
應聲榮茂兄弟相感合財寶遂為孝門

按鞏縣西南二十里孝義保據縣志以田氏紫荆得名
攷續齊諧記田真京兆人不言鞏人且縣志以田真為
隋人而續齊諧乃梁吳均撰又陸機詩三荆歡同株在
晉時已用田氏事則鞏志以為隋人者謬也至其故里
或在京兆或在鞏不妨兩存之耳

唐杜甫故里

舊唐書杜甫字子美本襄陽人後徙河南

縣

杜詩逸事甫十餘歲夢人令采文石於康水覺而問

人此水在二十里外乃往求之見我冠童子告曰汝本文
星典吏天使汝下謫為唐世文章雲誥已降可於豆壠下
取甫依其言果得一石有金字文云詩人本在陳芳國九

夜捫之麟篆熟聲振扶桑享天福

按鞏縣東二里瑤灣工部故里也故鞏
城有康水去瑤灣二十里與逸事合

宋蔡齊宅

見鞏舊志

按鞏西南永安故縣東有蔡莊鞏志以為蔡齊故里其
宅北直真宗定陵今為蔡莊廟廟前石坊鐫蔡文忠公
故居攷東都事畧及宋史併云齊膠水人不言在鞏且
洛陽志亦載之據史其先洛陽人曾與蔡為膠水令遂
家焉齊固非洛人也史又稱齊少孤依外家劉
氏豈劉氏在鞏而齊遠來相依歟然不可攷矣

金盧亞宅

通志盧亞金正大中狀元

按鞏永安廢縣中有狀元坊為盧亞立也亞生時永安
產靈芝金遂改永安為芝田亞宅在今芝田鎮北街據
狀元譜無亞名蓋譜惟列宋元正統亞為金狀元故不
見於譜而見於通志但通志不以亞為鞏人而以爲偃
師人何也蓋亞嘗讀書於緱山緱山舊隸永安今入偃
師通志乃據偃志登入非其實也至鞏志載亞為元至

正狀元且引順帝時產靈芝為言改芝田在金時元時
金芝田已廢于元季產芝何涉縣志又載吳臨川送盧
廉使還朝序以為即盧亞不知盧
廉使自別一人官翰林非狀元也
以上鞏縣

唐王維宅 王維詩家住孟津口門對孟津河 孟津

宋張思叔宅 李通志釋字思叔壽安人初釋家貧甚年長

未知學傭力于市聞邑官傳呼聲心慕之間人曰何以得

此人曰此讀書所致爾即發憤力學往受業伊川先生

按宜陽志思叔讀書處
在文筆峯山半今有祠

宜陽

許由隱窟 魏書地形志陽城郡康城有許由隱窟 高士

傳許由字武仲陽城槐里人隱於箕山

周頽考叔故居 通志在登封縣頽谷今有祠

按頽谷今為登封翟峪左傳
所謂頽考叔為頽谷封人也

周鬼谷宅 名勝志鬼谷宅在登封北五里蘇秦事師習于

鬼谷即此 神仙傳王詡楚人隱居韜知常入雲夢山後

居陽城之鬼谷蘇秦張儀師事之 拾遺記儀秦嘗息大

樹之下假息而寐有一先生問二子何勤苦也儀秦問子

何國人曰吾生於歸谷亦云鬼谷鬼者歸也又云歸者谷

名也即探胷內得二卷書言輔時之事

按鄴侯外傳有竇庭芝者分司洛邑常敬事胡蘆生一
日生言君家禍將成若非遇黃中君即見鬼谷子可無
患仍具述其行貌衣飾戒以必求後必入洛乘驟忽驚
逸入尹所居泌造門庭芝得延接贈遺甚厚後庭芝陷
降朱泚德宗命誅之泌具以前事聞原之帝曰黃中君
指朕也未知呼卿鬼谷子為何泌曰先人墓在河清谷

前恐以此言之據是則孟津亦有鬼谷不獨登封也

唐田游巖宅 唐書田游巖傳帝營奉天宮游巖舊宅直宮

左詔不聽毀天子自書榜其門曰隱士田游巖宅

按游巖宅在奉天宮左奉天宮即高陽觀在太室前登封縣北通志記奉天宮游巖宅而曰在縣南箕山何也蓋游巖有兩宅通志誤合為一耳兩宅者一在太室前一在箕山上游巖始居太室前奉天宮左後自汝被召歸止許由祠旁自署曰由東鄰高宗幸其第存問其母游巖野服出拜曰臣所謂泉石膏肓烟霞痼疾者許由祠蓋在箕山上也

唐盧徵君宅 名勝志在登封東二十里唐書徵崇山處士

盧鴻為諫議大夫李太白贈鴻詩云陶令辭彭澤梁鴻出會稽我尋高士傳君與古人齊 盧鴻宜作盧鴻乙

唐石門幽居 通志在登封縣頽陽北唐元丹邱別業李白

詩故人棲東山自愛邱壑美青春卧空林白日猶不起松風清襟袖石潭洗心耳羨君無紛喧高枕碧霞裏 上登封

秦甘羅故里 通志甘羅故里在新安縣北二十里今名甘

鄉即白墻村 新安

戰國藺相如宅 李通志藺相如宅在澠池縣學宮南今為

儒學射圃

戰國廉頗宅 李通志廉頗宅在澠池縣治東

按史記廉藺趙人藺相趙王會秦澠池廉頗送王至境言三十日不還則請立太子以絕秦望曰至境則澠池在境外非趙地澠池安得有廉藺二人宅且相如猶從趙王至澠池廉頗守國未出李志未免附會

可有守志 卷之六十五 古蹟志 宅里二

漢周黨隱居 後漢逸民傳周黨太原人建武中徵為議郎

去職將妻子居黿池復被徵著短布單衣穀皮綃頭待見
尚書及引見伏而不謁自陳願守所志帝乃許焉遂隱居
黿池著書上下篇而終 以上黿池

漢孔叢子宅 孔氏譜孔叢子名鮒字子魚先師九代孫秦
始皇將焚書鮒知之與弟騰及樹藏書於祖堂壁中隱嵩
山之陽

按孔叢子宅在古神陰鄉今海角村
有孔廟一區即其故宅也見嵩志

三國胡昭宅 魏志胡昭轉居陸渾山中閭里敬而愛之建
安中百姓惡憚遠役孫狼等起兵陸渾長張固依昭住止

寇到陸渾南長樂亭自相約誓言胡居士賢者也不得犯
其部落一川賴昭咸無怵惕天下安輯徙宅宜陽 高士
傳幽州刺史杜恕嘗過昭所居草廬之中言事論理辭意
謙敬恕甚重焉太尉蔣濟辟不就

唐宋之間宅 宋之間陸渾山莊詩歸來物外情負杖闔巖
耕流水看花入幽林采藥行野人相問姓山鳥自呼名去
去獨吾樂無能媿此生

唐元德秀宅 唐書元德秀傳元德秀字紫芝河南人居陸
渾質厚少緣飾事母孝舉進士不忍去左右

按嵩志紫芝故
居在今元里村

宋程伊川先生宅 伊川年譜崇寧二年言者論其著書非
 嬰朝政於是有旨追毀出身以來文字其所著書命監司
 覺察先生於是遷居龍門之南止四方學者曰尊所聞行
 所知可矣不必及吾門也
 以上嵩縣

府志卷之六十五終

河南府志卷之六十六

古蹟志十二 鄉 聚 坊 街 市 井

鄉

漢圍鄉 後漢郡國志雒陽有圍鄉注左傳昭二十二年單
 氏伐東圍

漢蒯鄉 後漢郡國志河南有蒯鄉注左傳昭二十三年尹
 辛攻蒯
 以上洛陽

漢尸鄉 後漢郡國志偃師有尸鄉注帝王世紀曰尸鄉在
 縣西三十里 水經注搜神記曰祝雞翁者洛陽人也居
 尸鄉北山下養雞百年餘雞至千餘頭皆有名字欲取呼

之名則種別而至後之吳山莫知所去

偃師

晉東鄉 見舊府縣志

按鞏縣志晉潘岳居鞏之東鄉李濂通志則以為鞏縣潘岳宅在洛陽鞏志不知何據恐因岳墓而誤耳

漢中鄉 水經注 龜池川本中鄉地也漢景帝三年初徙萬

戶為縣 龜池 十三里

聚

周蕙狐聚 陽人聚

按二聚在梁故國今其地入汝州伊陽舊志誤列

漢唐聚 後漢郡國志 雒陽有唐聚 詳都邑

漢上程聚 後漢郡國志 雒陽有上程聚 詳都邑

漢士鄉聚 後漢郡國志 雒陽有士鄉聚 注 馮異斬武勃地

漢褚氏聚 後漢郡國志 雒陽有褚氏聚 注 左傳昭二十六

年王宿褚氏杜預曰縣南有褚氏亭

漢樊濯聚 方輿紀要 樊濯聚在故洛城北東漢清河王慶

母宋貴人葬處 以上洛陽

漢劉聚 前漢地理志 緱氏有劉聚 詳都邑

漢鄔聚 後漢郡國志 緱氏有鄔聚 詳都邑 以上偃師

漢東訾聚 後漢郡國志 鞏有東訾聚

按晉地道記曰東訾在縣之東與杜預所謂在縣西南者異路史本杜預以鞏西南訾城為東訾反以訾為東在鞏西界外不知晉地道記謂在縣東者較杜預為確也詳辨在都邑門

漢坎埽聚

後漢郡國志鞏有坎埽聚注杜預曰在縣東地

道記曰在南

五見都邑

以上鞏縣

周鐵聚

方輿紀要鐵聚在登封南史記鄭聲公八年晉伐

鄭敗我師於鐵是也

登封

漢廣城聚

後漢郡國志新城有廣城聚

按府續志以廣城疑在汝州地

漢鄆聚

後漢郡國志新城有鄆聚古鄆氏今名蠻中注杜

預曰縣東南有蠻城又祭遵獲張滿也

以上嵩縣

坊

漢九子坊

漢宮闕名洛陽故北宮有九子坊

按說文坊者邑里之名又王珉答徐邈書見傅咸彈孫詹事或云是宮或云坊或云寺東宮中別有坊又中庶子稱坊詹事稱寺同於九卿耳坊是通名如天朝之稱臺省也據二者一為里居一為府署固不得同大率坊者以為表也表里居表府署故得通用而後世又專為旌表之坊矣

漢太尉坊

司徒坊

水經注渠水枝分夾路南逕出太尉

司徒兩坊間

晉洛陽宮十坊

晉宮闕名洛陽宮有顯昌坊修成坊綏福

坊延祿坊休徵坊承慶坊桂芬坊椒房坊舒蘭坊藝文坊

後魏王子坊

見前都城西宅里

後魏白象坊

伽藍記在永橋南白象乾羅國王所獻皆施

五彩屏風七寶坐牀容數人真是異物常養象於乘黃曹

象敗墻走出百姓驚怖遂徙象於此坊

後魏獅子坊

伽藍記在永橋南獅子者波斯國王所獻為

万俟醜奴所獲永安末達京師莊帝詔近山郡縣捕虎以

送鞏縣山陽並送二虎一豹帝在華林園觀之虎豹見獅

子悉皆瞋目不敢仰視廣陵王即位詔還本國

後魏吳人坊

伽藍記歸正里民間號為吳人坊南來投化

多居其內近伊洛二水任其習御里三千餘家自立巷市

所賣口味多是水族時人所謂魚鱉市也張景仁住此以

為耻遂徙居孝義焉

宜人坊

兩京記東京宜人坊其半本隋齊王暕宅煬

愛子初欲書坊為宅帝問宇文凱曰里名謂何凱曰里名

宜人帝曰既號宜人奈何無人可以半為王宅

隋洛南九十六坊

洛北三十坊

道術坊

粳米窖坊

東錢坊

西錢坊

鷹坊

馬坊

俱見前隋都城宅里

唐明教坊

兩京記明教坊龍興觀西南隅開府宋璟宅南

門之東國子司業崔融宅璟造宅悉東西相對不為斜曲

以避惡名融為則天哀策用思精苦下直馬過其門不覺

文就而卒

唐殖業坊

朝野僉載兵部郎中朱前疑悅殖業坊酒家

唐尊賢坊

西陽雜俎坊有田令宅紫牡丹發花千朶

唐碎錦坊

洛舊志在晋公午橋莊文杏百株花時燦爛俗

錦因以名之

唐振德坊

洛舊志洛陽振德坊皆貧民賀知章因目為糠

市

宋陶化坊

邵氏聞見錄王文康受知寇萊公妻以女居洛

之陶化坊洛人至今稱為西州王相公宅

以上洛陽

街

漢御街

水經注南直宣陽門經緯通達皆列馳道往來之

禁人同兩漢曹子建嘗行御街犯門禁以此見薄

街

水經注渠水枝分夾路南逕出太尉司徒兩坊

謂之銅駝街舊魏明帝置銅駝諸獵於闔闔門南街陸

機云駝高九尺即出太尉坊者也

晉書索靖傳靖有先

識遠量知天下將亂指洛陽宮門銅駝嘆曰會見汝在荆

棘中耳

按魏晉都城為古洛陽則銅駝街固在故城中今洛陽城東乃有銅駝巷多銷鑠鐵餘豈嘗銷銅駝于此與

晉東宮街

水經注側廣莫門道東建春門路北路即東宮

街也

隋端門街

見隋都城宅里

以上洛陽

市

漢洛陽市

拾遺記王溥安帝時家貧不得仕乃挾竹簡插

簪於洛陽市傭書美於形貌又多文辭來僦其書者丈夫
贈衣冠婦人遺珠玉一日之中衣寶盈車以善筆而得富
先時穿井得鐵印銘曰傭力得富錢至億庾一土三田軍
門主簿後以一億錢輸官得中壘校尉三田一土壘字也
中壘校尉掌北軍壘門故曰軍門主簿 後漢王充傳充
好博覽而不守章句家貧無書常游洛陽市肆閱所賣書
一見輒能誦憶遂博通衆流百家之言

漢粟市 晉書食貨志漢顯宗卽位歲比登稔永平五年作
常滿倉立粟市於城東粟斛直錢二十

金市 水經注凌雲臺西有金市金市北對洛陽壘 晉

書衛玠傳總角乘羊車入市見者皆以爲玉人觀之者傾
都 王勃賦入金市而乘羊出銅街而試馬

晉牛馬市 伽藍記東石橋南卽中朝牛馬市刑嵇康之所
嵇康傳康將刑東市索琴彈之曰廣陵散於今絕矣

晉羊市 陸機洛陽記洛陽舊有三市一曰金市在宮西大
城內二曰馬市在城東三曰羊市在城南

按三市在故洛城內外今洛城南有馬市
街城東門外有羊市都城既移市亦互易

晉旗亭市 伽藍記建陽里土臺中朝旗亭也土有樓懸鼓
擊之以罷市

後魏四通市 伽藍記立市於洛水南號曰四通市民間號

為永橋市伊洛之魚多於此賣士庶須臾皆詣取之魚味甚美京師語曰伊洛鯉魴貴於牛羊

後魏洛陽大市 [伽藍記]西陽門外四里御道南有洛陽大市周迴八里

後魏洛陽小市 [伽藍記]青陽門外孝義里東即洛陽小市後魏魚鱉市 見前吳人坊

隋大同市 [大業雜記]大同市周四里在河南縣西十里

隋通達市 [大業雜記]出上春門傍羅城南行四百步至漕渠傍渠西行三里至通達橋橋跨漕渠橋南即入通達市二十門分路入市市東合漕渠市周六里其內郡國舟船

舳艫萬計市南臨洛水

隋豐都市 [大業雜記]臨寰橋南二里有豐都市周八里通

門十二其內一百二十行三千餘肆薨瓦齊平遙望如一榆柳交陰通衢交注市四壁有四百餘店重樓延閣互相臨映招致商旅珍奇山積 以上洛陽

井

古玉井 [水經注]渠水又東枝分南入華林園歷疏圃南圃中有古玉井井悉以珉玉為之以錙石為口工作精密猶不變古璨焉如新

漢甄官井 [方輿紀要]甄官井在故洛城南甄官掌琢石陶

土之事晉以為甄官署漢時蓋屬於他署而井因以名後漢初平二年孫堅討董卓敗之進至洛陽得傳國璽於城南甄官井中即此

按井上有五色雲氣見堅使人浚之乃得璽

魏摩陂井 [魏志明帝紀] 青龍元年春正月甲申青龍見邾之摩陂井中二月丁酉幸摩陂觀龍於是改元改摩陂為龍陂賜男子爵人二級鰥寡孤獨無出今年租賦

魏九龍殿井 [魏略] 穀水過九龍前為玉井綺欄蟾蜍金受神龍吐出

魏八角井 [伽藍記] 凌雲臺魏文帝築臺上有八角井

後魏義井 [伽藍記] 義井里北門外有叢樹數株枝條繁茂下有甘井一所石槽鐵罐供給行人飲水庇蔭多有憩者

按義井里在故洛城中今故洛城東門外偃洛界上有義井鋪名存而地非或後人移鋪於此耳

後魏元義宅井 [伽藍記] 元義宅掘故井得石銘云是荀彧宅

隋乾陽殿庭井 [大業雜記] 乾陽殿庭左右各有大井井面濶二十尺

唐七井 [雲仙雜記] 唐霍仙鳴別墅在龍門一室之中開七井皆以雕鏤木盤覆之夏月坐其上井生涼不知暑氣

唐白居易井 [唐書白居易傳] 有言居易母墮井死而居易

賦新井篇言浮華無實行不可用出爲州刺史追貶江州司馬南部新書白樂天之母因看花墜井後有排擯者以賞花新井之作左遷穆皇賞題柱曰此人一生爭得水

唐清化里井博異記陳仲躬天寶中於洛陽清化里假居一宅有井好溺人仲躬窺井上見水影中一女子紅袖半掩微笑乃嘆曰是乃溺人之繇也遂退一日有人叩門云敬元穎命入則井中所見者仲躬訊之曰妾非殺人者自漢絳侯穿此井毒龍潛焉好食人已殺三千餘命某國初豎井爲所驅使非所願也今龍已朝太乙幸井無水君子

誠能命匠淘之則妾獲脫免當有以報君矣言訖失所在乃命匠入井獲古銅鏡一枚面濶七寸八分嘆曰斯乃敬元穎也一更後來謝且言某本師曠十二鏡之七貞觀中爲許敬宗婢蘭苔所墮遂不復見形仲躬觀鏡背蝌蚪書曰維晉新公二年七月七日午於首陽山前白龍潭鑄成此鏡背上環書一字管天文一宿左日右月龜龍豬象并依方安焉鼻中題曰夷則之鏡

宋琉璃井李通志在府城外發祥寺側宋太祖汲此水浴後甃以琉璃至今石壓其上以上洛陽

少室雲母井嵩高山記少室山有雲母井出雲母登封

嶢嶢龍井 李通志在永寧縣西北嶢嶢山下三井相連木覆其上相傳動則有風雨雹繼出 永寧

永寧縣志

永寧縣志

永寧縣志

永寧縣志

永寧縣志

永寧縣志

永寧縣志

河南府志卷之六十七

古蹟志十三 書院 溝渠

書院

唐麗正書院 唐書百官志開元十二年東都明福門外亦

置麗正書院

唐集賢書院 藝文志元宗命左散騎常侍昭文館學士馬

懷素為修圖書使與右散騎常侍崇文館學士褚無量整

比會幸東都乃就乾元殿東序檢校 乾元殿即武后時東都明堂 又借

民間異本傳錄及還京師遷書東宮麗正殿置修書院於

著作院其後大明宮光順門外東都明福門外皆創集賢

書院學士通籍出入兩都各聚書四部以甲乙丙丁爲次
列經史子集四庫其本有正有副軸帶帙籤皆異色以別
之

玉海東都集賢院明福門外大街之西對武成宮
按百官志開元十三年改麗正修書院爲集賢殿書院
事併詳張說傳故麗正書院集賢書院志併言在明福
門外然藝文志於集賢書院曰創似不一地故併列之
又書院之名始於唐其始曰修書院修書之院也至宋
四大書院皆頒官書處學徒猶有藏書也
後世書院但處學徒其有藏書者寡矣

宋同文書院

李通志同文書院在河南府城西南洛舊

志宋同文書院退齋有記

明伊洛書院

李通志伊洛書院在河南府城南五里安樂

窩舊址成化十七年提學僉事吳伯通建

以上洛陽

宋嵩陽書院

玉海至道初賜院額及印本九經書疏祥符

三年賜太室書院九經景祐二年西京重修太室嵩陽書

院詔以嵩陽書院爲額又至道三年五月戊辰河南府言

甘露降書院講堂宋初斯民新脫五季鋒鏑之厄學者尚

寥海內向平文風日起儒老往往依山林卽間曠以講授

大率多至數十百人嵩陽嶽麓睢陽及白鹿爲尤著天下

所謂四書院者也嵩書五代周時改道院爲書院宋至

道三年賜名太室書院景祐三年更名嵩陽王曾奏置院

長給田一項供爨

按周改道院爲書院宋時稱盛金元時又廢爲道宮明
嘉靖間卽故址建二程祠明末廢國朝邑令葉封改

建於故址之東南祀宋提舉管勾諸賢邑宮詹耿逸菴先生又增置焉

宋頴谷書院 李通志頴谷書院在登封縣西南宋崇寧間建并立廟以祀宣聖後廢復建 李通志以上登封

元洛西書院 李通志洛西書院在永寧縣治東里仁街北元至正元年翰林直學士薛友諒建明宣德二年僉事劉

咸修葺

元伊川書院 李通志伊川書院在嵩縣北鳴皋鎮元

三年建明永樂十四年修僉事劉咸記伊川書院 李通志先聖先師其殿兩廡東祀程夫子兄弟及濂溪康節橫渠溫公南軒東萊晦菴九先生西祀許魯齋 嵩縣

按書院文教所關豈可使廢為古蹟我朝文治隆各府縣皆置書院或修廢或新建數倍於古別

詳學校門茲特取前代書院舊地所在入古蹟門中

溝渠

澤渚隄堰並載

周陽渠 水經注按陸機洛陽記劉澄之永初記言城之西面有陽渠周公制之也昔周遷殷民于洛邑城隍偏狹卑陋之所耳晉故城成周以居敬王秦又廣之以封不韋以是推之非專周公可知矣

按陽渠者洛陽渠也名似起于漢沮鄴注據洛陽記永初記以為周公制之則周時有故渠矣渠在古洛陽依漢魏引穀洛過今洛陽北東入古洛陽則周公所引者必穀洛二水也詳在下

周穀水渠 水經注左傳襄公二十五年齊人城郊穆叔如

周賀韋昭曰洛水在王城南穀水在王城北東入于漚至靈王時穀水盛出於王城西而南流合於洛

按周公營洛時在澗水東漚水西澗穀至王城為穀即澗也周公時穀于王城西南入洛然據韋昭說穀在靈王前已在王城北入漚蓋周公制陽渠必引穀入漚遂并引而東入陽渠也舊志殊未分明

穀水堰 水經注按史傳周靈王之時穀洛二水鬪毀王宮王將塲之太子晉諫王不聽遺堰三堤尚存

水枝瀆 水經洛水又東枝瀆左出焉注東出關絕惠

水故瀆又東逕周山東北逕三王陵東北歷河南縣郟鄩又北入穀蓋經始周啟瀆久廢不修矣啟疑作故

按瀆注以洛水枝瀆為經始于周豈亦周公制之歟蓋穀水過王城北東入陽渠時有小旱則水不足故必枝

升洛水以入穀嘗攷枝瀆故道在今三山傍周山作溝渠纏周山首而北入穀其地當今穀水入洛上

漢陽渠 後漢張純傳建武二十三年為大司空明年上穿

陽渠引洛水為漕百姓得其利注陽渠在洛陽城南 水

經注漢司空漁陽王梁之為河南也將引穀水以溉京都渠成而水不流故以坐免後張純堰洛而通漕洛中公私懷贍是渠今引穀水蓋純之創也 方輿紀要述征記東

城有二石橋舊於王城東北開渠引洛水名曰陽渠東流逕洛陽于城東南回通出石橋下運至建春門以輸常滿倉水經注上東門外石橋右柱銘曰陽嘉五年詔書以城下漕渠東通河濟南引江淮方貢委輸所由而至乃作石

橋此卽陽渠與穀水回通處也

按漢時陽渠據漢書水經注為引洛水但漢時洛水貫城陽渠據漢書注在城南則引洛水者似謂引洛南出之水然洛之經流在中穀水在北陽渠在南穀與陽渠何由回通且漢書謂引洛通漕自在洛水北水經注謂今引穀水蓋純之制亦在洛北然則漢書注謂陽渠在洛陽南者不可從矣蓋純之陽渠卽酈注所謂穀水渠陽渠所引之洛水卽周時所引之洛水左枝瀆王梁但引穀水故渠成而水不流水小也張純併引洛水而渠成水大也其實陽渠本通穀洛二水非有二渠故述征記謂穀洛二水本于王城東北合流是已但漢陽渠之源猶可攷至貫都城處雖有水經注可據而漢時舊渠與後魏渠又不能無異何也漢時洛水貫城陽渠在洛北不能遠城南後魏時洛水不貫城穀水自城西五分或遠城北或遠城南或貫城中而復會于城東卽遠城南者猶仍漢名曰陽渠水其實漢陽渠不遠城南後魏陽渠乃繞城南也唐章懷太子注漢書據水經注為言耳方輿紀要亦合漢與後魏而一之故讀者多不分曉

漢溝

文選注洛陽記曰天淵南有召溝御溝也

魏穀水湖溝

水經注河南城西北穀水之右有石磧磧南

出為死穀北出為湖溝魏太和七年暴水流高三丈此地下停流以成湖渚造溝以通水東西十里决湖以注瀝水

按所謂死穀者穀澗自王城西入洛故道也所謂湖溝者卽韋昭所謂穀在王城北東入瀝之故道也在靈王前已如此漢因之至魏乃有湖溝之名蓋歲久水激成溝湖非專人力所通

魏千金渠

五龍渠 水經注穀水逕乾祭門北東至千金

場河南十二縣境簿河南縣城東十五里有千金場舊堰穀水魏時更修此堰謂之千金場積石為場而開溝渠五所謂之五龍渠渠上立場場之東首立一石入石入腹上

刻勒云太和五年二月八日庚戌造築此場更開溝渠此水衡渠上其水助其堅也必經年歷世是故部立石人以記之云爾蓋魏文帝修王張故績也場是都水使者陳協所造也語林曰陳協數進阮步兵酒後晉文王欲修九龍渠阮舉協文王用之掘地得古承水銅龍六枚堰遂成歷場東注謂之千金渠

按水經注箋于石人文此水衡渠上其水下謂有誤當云此水衡渠止其水改爲爲衝改上爲止是欲通以場爲遏之義而不曉場作如何制渠傍作場又如何行水而妄以意改者也蓋引穀水過河南城北東注灑必有灑水舊激深溝不能與灑俱橫引而東入古洛陽必積爲石場引而東過而北即暑雨下注之水又勢不能不直衝壞渠而南出則作場時又必于衡場下南北直通溝渠乃可使灑溝暴漲之水南出而不壞場如是則石

人文謂開溝渠者開場下通暴漲南出之水也其曰此水衡渠者謂穀水衡流場上而東引者也曰上其水者上上之也謂高之也穀水既衡引於溝渠之上故曰上其水其衡引於溝渠上而東流者曰千金渠穀水經流也其下開溝渠五而南北出者曰五龍渠泄灑溝暴漲之水也二渠一縱一衡一上一下場衡在上故從千金渠之名而曰千金場銅龍設在場下南北吐納注以爲得古銅龍六蓋其法自古有之也或曰銅龍衡設場上引穀水東注場下但通溝渠不須銅龍甚有理然注謂開溝渠五謂之五龍渠渠上方立場則銅龍自設于下不設于上道元目見當不謬耳

晋代龍渠 水經注 千金渠逮于晋世大水暴注溝瀆泄壤

又廣功焉石人東脇下文云太始七年六月二十三日大水并瀑出常流上三丈蕩壞二場五龍泄水南注瀉下加歲久激齧每澇卽壞歷載消棄大功今故爲今過

宋本作捐棄大溝渠

功故為宋本更於西開泄名曰代龍渠地形平正誠得為作瀉

泄至理千金不與水勢激爭無緣當壞由其卑下水得輸

宋本作輸上激齧故也今增高千金於舊一丈四尺五龍自然

必歷世無患若五龍歲復壞可轉於西更開二場二渠

合用二十三萬五千六百九十八功以其年十月二十三

日起作功重人少到八年四月二十日畢代龍渠即九龍

渠也後張方入洛破千金場公私賴之水積年渠塌頽毀

石砌殆盡遺基見存朝廷太和中修復故塌按千金場石

人西脇下文云若溝渠久疏深引水者當於河南城北石

磧西更開渠北出使首孤立故渠東下因故易就磧堅便

時事業已訖然後見之加邊方多事人力苦少又渠塌新
成未患於水是以不敢預修通之若於後當復興功者宜
就西磧故書之於石以遺後賢矣雖石磧淪敗故跡可憑
準之於文北引渠東合舊瀆

按石人京脇文五龍泄水南注瀉下則知五龍渠為北
來南出之渠用以泄瀾溝暴漲之水也又曰加歲久激
齧每湧即壞蓋瀾溝暴漲之水逢湧水大則壞五龍渠
也蓋水大則五龍渠不及泄故更于西開泄名曰代龍
渠如是則代龍渠亦北來南注用以分五龍水勢故曰
得泄至理泄多則水勢不激上千金渠衡在上者亦不
壞故曰千金不與水勢激爭無緣當壞又曰由其卑下
水得踰上激齧謂舊日千金渠衡在上者卑下今增高
千金於舊一丈四尺五龍自然必歷世無患上下本相
承成文中增有故也二字人多誤屬上讀遂不可解蓋在
下南注者增多代龍渠固所以泄水在上衡設者增高
千金渠亦所以泄水所泄者皆瀾溝暴漲之水也東脇

文曰若五龍歲久復壞可轉於西更開二場至西陽文
則全釋此二句之義其必欲于河南城北石磧西更開
渠北出者蓋千金引穀水自河南城西過河南城北凡
北即暑雨下注之水雖不如灑溝之大而逢澇南注皆
足以壞渠舊有石磧當是激水東注灑溝由五龍渠南
注不如即石磧西更開渠北出使若五龍之於千金一
縱一衡者然但石磧作渠不必五道亦能泄水故曰使
首孤立首者渠首也漢書溝洫志每言渠首是已箋者
謂當云使首孤即取孤死首即之義殊不然道元意欲
準之于文北引渠東合舊灑曰東合不過合入灑溝耳
于石人文開渠北出之義亦不協蓋北出必南注不得
東合道元時渠碣已屬頽毀雖引穀水殊非漢魏之舊
因文演義不必
即前人意也

晉石渠

水經注舊灑又東晉惠帝造石渠於水上按橋西

門之南頰文晉元康二年十一月二十日改治石巷水門

除堅

宋本作堅

枋更爲函枋立作覆枋屋前後辟級續石障使

南北入岸築治澌處破石以爲殺矣到三年三月十五日
畢記并紀列門廣長深淺于左右巷東西長七尺南北龍
尾廣十二丈巷瀆口高三丈謂之畢門橋

按畢門橋近故洛城西北酈注引橋西門之南頰文乃
作石巷水門之法也其謂豎枋函枋覆枋者揚子方言
蜀人以木偃魚曰枋此作橋下水門舊立豎枋即橋下
柱或木或石皆得更爲函枋覆枋必石乃得故曰石渠
爲函枋故曰巷爲覆枋故曰屋但于渠上作橋率用此
法又曰續石障使南北入岸障者障水使不得衝激也
則石渠之作必爲別有衝激之水作此石巷水門以時
啟閉令衝激之水不得入石巷水門耳蓋畢門以東水
貫帝都故作此水門逢澇水漲則障水使南出入洛入
石門者旱澇如一若是則石巷水門爲渠作也非爲橋
作也故不入橋梁門而見于此○又按水經注石渠下
乃曰又東左會金谷水金谷在今府城西北引穀水過
河南城北之上二水已會爲一不得越灑
溝行數十里方入穀也酈注乃錯簡耳

晉梓澤 輿地志梓澤在王城西北三十里與金谷相近

山川志梓澤名去王城二十四里

後魏都城北渠 水經注穀水逕洛陽小城北號曰洛

陽壘又東大夏門下故夏門也穀水又東逕廣莫門北

漢之穀門也穀水又東出屋南宋本作東屈而逕建春門石橋下

即上東門也

按此遶城北之穀水渠至建春門石橋下即前所謂與陽渠回通處也其自大夏門枝分入城者別見下

後魏遶城南穀水渠 水經注陽渠南 水南暨閭闔門漢

之上西門也穀水逕閭闔而南土山東南出逕西陽門舊

漢時之西明門也穀水又南逕白馬寺東穀水又南逕西

門門 西門門疑 故廣陽門也穀水又南東屈逕津陽門南

穀水又逕靈臺北穀水又東逕平昌門南故平門也又逕

明堂北穀水又東逕開陽門南故建陽門也又東逕國子

太學石經北穀水於城東南隅枝分北注逕青陽門東故

清明門也又東逕東陽門東又北逕故太倉西又北入洛

陽溝

按此遶城南之穀水渠首曰陽渠者以此渠自城西逕城南又枝分而北入洛陽溝即與遶城北之穀水回通處渠在城東舊有陽渠之名故在城西北先以陽渠標目後不曰陽渠仍曰穀水者以所引與城北穀水本一水在城西北分枝遶城陽渠水亦得曰穀水且在城東南隅有枝分而北入洛陽溝者謂之陽渠其穀水東流者又為池為方湖并注鴻池陂又過偃師東方入洛離城東陽渠與城北穀水在建春門外已回通而城東南

隅之穀水渠自有經流故于渠在城西城南者皆曰穀水不曰陽渠道元記水支派分明不得議其措語倒亂也。又按遶城北之穀水枝分入城者一在大夏門入遶城西之穀水枝分入城者二一在城西北枝分歷故石橋東入城一在西門左枝分入城二渠併見下

後魏大夏門枝分入城渠 水經注穀水歷大夏門下門內

東側際城有魏文帝所起景陽山山東舊有九江洛陽記

九江作負水水中作負壇三破之夾水得相逕通今九江

無復髣髴渠水又東枝分南入華林園歷蔬圃又歷景陽

山北東注天淵池自天淵池東出華林園逕聽訟觀南又

東流于洛陽縣之南池池即故狄泉也後為東宮池

按自大夏門枝分入城之水至東宮池下屬注不言所出蓋東宮池即狄泉側廣莫門道東建春門路北

陽為東北其水當由建春門出城注石橋下矣

後魏城西北枝分入城渠 水經注穀水北乘高渠枝分上

下歷故石橋東入城逕望先寺又東歷故金市南直千秋

門右宮門也又枝流入石逗伏流注靈芝九龍池其一水

自千秋門南流逕神虎門下東對雲龍門又南逕通門掖

門西又南流東轉逕閭闔門南 前閭闔都城上西門此閭闔王宮正門 渠水

又枝分交路南逕出太尉司徒兩坊間謂之銅駝街渠水

又西南 疑作南 歷廟社之間南注南渠渠水自銅駝街東逕司

馬門南渠水又東逕杜元凱所謂狄泉北今不類泉陂不

得為狄泉渠水歷司空府前逕太倉南東出陽門石橋下

注陽渠

按貫城渠水自閘闔門前枝分為二夾路行右枝歷廟社開南注南渠所謂南渠者西明門左枝渠入城者也詳在下左枝自銅駝街東轉逕司馬門司空府太倉南而東出城酈注曰東出陽門當作出東陽門東陽門外亦有石橋通御道不獨建春東陽也

後魏西明門枝分入城渠

水經注西明門左枝門渠入

城逕太社前又東逕太廟南又東於青陽門右

西明門渠

按上貫城二渠皆曰下注陽渠知穀水逸城南至城東通名陽渠也

後魏都城東南穀水渠

水經注穀水於城東南隅又東左

迤為池又東右出為方湖又東南轉屈而東注謂之阮曲

又東注鴻池陂其水又東左台七里澗

按七里澗即建春門外穀水與陽渠水在石橋下同通之水也其水自石橋歷馬市石橋又東至七里澗與城東南隅穀水合其下通曰陽渠故又別記陽渠經流於下

後魏建春門外陽渠

水經注穀水逕建春門石橋下自樂

道里出而東出陽渠又東逕馬市石橋又東七里澗旅人

橋陽渠水又東流逕漢廣野君酈食其廟南廟在北山上

又東逕毫殷南又東逕偃師城南又東流注于洛水

按上二渠今其地皆入偃師以為與上連城貫城諸渠原委分合相為流通故類記于此○凡所引水經注在本文不必在一段中意欲分晰明白故多所剪裁撮合成文非妄割裂也

隋黃道渠

天業雜記出端門百步有黃道渠上有黃道橋

三道

隋重津渠 大業雜記過洛二百步又疏洛水為重津渠濶四十步上有浮橋津有時開闔以通樓船入苑

隋甘泉渠 大業雜記建國門南二里有甘泉渠疏洛入伊渠上有通仙橋五道

隋龍鱗渠 大業雜記西院內造十六院並臨龍鱗渠渠面濶二十步上跨飛橋過橋百步即楊柳修竹四面鬱茂名花美草隱映軒陛

隋丹水渠 大業雜記長夏門南二里至丹水渠南五里至伊水東北流十餘里入洛

按丹水渠乃南引伊水北流至長夏門南二里折而東北流十餘里入洛

隋通津渠 元和志通津渠在河南縣南三里隋大業元年

分洛水西北名千步磧渠東北流入洛水

按隋城跨洛南通津在城南三里是渠在洛水南也故東北流入洛舊洛志誤以千步為千金疑在洛水北故遂以通津渠與通濟渠為一不知通津渠在洛水南通濟渠在洛水北玉海引元和志二渠並記非謂一渠也方輿紀要亦誤

隋通濟渠 煬帝紀大業元年三月發河南諸郡男女百餘

萬開通濟渠自西苑引穀洛水達於河

按通濟渠即大業雜記所謂漕渠也出上春門傍羅城南行四百步至漕渠是渠在洛水北引穀洛水入渠也

隋金水渠 方輿紀要金水在城西二十里隋時引水遶皇

城不流入渭水

按金谷水舊合穀水過河南城北隋時引穀洛通西苑
下入漕渠在府城南門外洛水北是穀水不過河南
城北矣惟金谷尚行城北故道所謂遶皇城也皇城北
有金水而金水北即山半尚有城址乃北羅城也穀即
澗不入澗即不入穀也

唐上陽三陂 李適之傳開元中為河南尹其政不苛為下
所便元宗患穀洛歲暴溢耗徭力詔適之以禁錢作三大
防曰上陽積翠月陂自是水不能為患刻石著功詔永王
璘書皇太子瑛書額

唐伊水石堰 唐書地理志河南府河南龍門山東抵天津
有伊水石堰天寶十載尹斐迎置

宋漕渠 方輿紀要宋開寶九年幸西京發卒自洛城市

鑿渠至漕口三十五里以便餽運

明伊洛渠 劉健重濬二渠記渠肇自唐時洛渠起郡治西
南東侯保分洛水而東曰莽渠莽渠之北又分三支曰清
渠曰單渠曰太陽渠凡四渠末流仍入洛伊渠起郡南伊
關口之北分伊水北行至午橋莊與洛渠交而出其上并
二支亦名莽渠清渠單渠但以東別之凡三渠俱入洛二
水之大可勝舟前代興廢不可考宣德初始塞宏治癸丑
徐都憲疏請濬治凡用夫匠二千七百有奇後塞憲副張
公鶴按行二渠如前濬之每渠障水之入各有壩防水入
之暴各有閘渠每深下之處又各有小閘閘內兩傍各有

子堰子堰中各有游渠以均水利於遠近又於洛渠南創一渠洛渠併前為五矣

按劉中... 創自唐玉海謂唐裴迥築伊水石堰者是已... 濠苑諸水漕口見方輿紀要至明重濬二渠而開壩之

大石堰

以上洛陽

周尹

二支亦各養

經注伊水自關東北流枝津右出焉東北

關口之北

小同注公路淵入于洛今無水戰國策曰東

渠曰單渠

周不下水蘇子見西周君曰今不下水所以

南東荆渠

民皆種他種欲食之不如下水以病之東周必

即甲谷渠

藉而復奪之是東周受於君矣西周遂下水即

蓋渠

注于洛

按伊水右枝渠當依南山麓起洛陽入偃師與公路澗合水合水者今段家灣水也上為公路澗伊水不能與合水同注深澗合水出澗口乃得合流廊注文當有誤又謂下水東周鞏古東周也右枝津當又與休水合乃入鞏界澗田可數十里凡過澗口處必依千金場石人交為制乃可行水法具現前至伊水左枝渠又隋唐引伊水之權輿也道元時伊洛在洛陽合流左枝渠當入洛陽今伊洛合流在偃師正南則伊水左枝渠亦偃師水利所必講不獨右枝渠也

晉計素渚 水經注洛水東逕計素渚中朝時百國貢計所

頓故渚得其名

按計素渚在偃師東南當為陽渠入洛之處

音九曲瀆 水經注故河南十二縣簿云九曲瀆在河南鞏

古蹟志

古蹟志

古蹟志

溝渠

縣西西至洛陽又按傅暢晉書云都水使者陳狼鑿運渠從洛口入注九曲至東陽門是以阮嗣宗詠懷詩所謂朝出上東門遙望首陽岑又言遥遥九曲間徘徊欲何之者也

按九曲瀆即陽渠入偃師者也河南十二縣簿以為在鞏縣西者晉廢偃師鞏洛接壤也

隋通濟渠

方輿紀要通濟渠在偃師縣南故陽渠也隋時

嘗修導之王世充自東都出兵擊李密至偃師營于通濟

渠南作三橋于渠上即此

按通濟渠起自洛陽已見前但通濟上引穀洛在洛陽界非漢晉千金故道入偃師則漢晉陽渠故道也

北即通山溝

方輿紀要在偃師西北三十里深二丈濶百

尺南起邙山北通孟津昔以邙山澗谷之水并流入洛每遇霖潦輒致泛溢因為此溝導之入河故曰通山溝

按溝在偃師西北三十里則近漢魏都城矣故防其泛濫通之使北入河且陽渠東流入洛有澗谷泛濫之水渠亦易壞則通山溝者為都城計亦為陽渠計也

以上偃師

古鮪渚

水經注崆嶺山下有穴謂之鞏穴言潛通浦北達

於河直穴有渚謂之鮪渚成公子安大河賦曰鱣鯉王鮪暮來遊周禮春薦鮪然非時及佗處則無故河自鮪穴已上又兼鮪稱呂氏春秋稱武王伐紂至鮪水紂使膠鬲侯周師即是方輿紀要東晉永和十年故魏降將周成反自宛襲洛陽河南太守謝施自洛陽奔鮪渚是也

漢飲馬溝 方輿紀要飲馬溝在鞏縣東七里呂布軍虎牢飲馬于此

後魏南蒲陂 水經注蒲池水出南蒲陂

按陂者作陂塘以溉田也今為凌溝菩提寺前水

宋神隄引洛入汴渠 方輿紀要元豐初張從惠言汴洛水歲閉塞修隄防勞費任有建議導洛入汴患黃河嘴廣武山須鑿山嶺十數丈以通汴渠功大不可為去年七月水退河稍北距廣武山麓七里退灘高濶宜鑿渠導洛為萬世利都水丞范子淵請于汜水鎮北門導洛為清汴通漕既又言河陰十里店以西至洛口地形西高東下可行水

請起自鞏縣神尾山至土家堤築大堤四十七里以捍大河起沙谷 亦在鞏東至河陰十里店穿渠五十二里以引洛屬

汴於是遣內侍宋用臣等相視興役自任村沙口至河陰縣瓦亭子達汴口接運河長五十一里兩岸為堤長一百

三里自是汴洛通流六年范子淵請築新隄及開展直河元祐五年復導河入汴紹聖初紹述議起因復閉汴口引

洛水

按隋唐運道漕轉江淮不過由汴入河由河入洛耳未有直通于汴者也宋范子淵議通洛汴其洛水北岸堤當起神尾山西至汜水河陰入汴口南過廣武二城間亦曰鴻溝所謂神尾山者北却盡處謂神都却山之尾也時又引古索河注三陂瀦水為塘以備洛水不足則決以濟之又自汜水關北開河五百五十步屬於黃河上

下置牖啟閉以通黃汴二河船筏又卽洛河口置水陸以泄伊洛漲水入大河仍修黃河南岸堤埽以防侵奪新河之漸于是徙汴口官吏於新洛口其法密矣然廣武山北卽大河故道洛水在鞏縣東北已入河時雖大故元祐四年梁燾上言復爲汴口導引大河又考宋史自引洛後洛水漲溢入河廣武掃危急朝議以掃去洛河不遠恐漲漫不灌京師旣而洛水大溢注於河帝曰若廣武掃壞河洛爲一則清汴不通京都漕運可憂詔吳安持等規度安持言廣武第一掃危急決口與清汴口絕近緣洛河之南廣武山千餘步地形稍高自鞏縣東七里店至今洛口不滿十里可別開新河導洛水近南行詔再案視卒依元豐舊制但元豐每事更張舊制未必盡善也

明神隄渠

方輿紀要神隄渠在鞏縣北三里中低而四圍

高常橫流爲患永樂十六年縣丞華胥開此渠而水患息

按神隄在今縣北爲邨聚正在神尾山之下

以上鞏縣

晉河中渚

水經注郭頒世語曰晉文王之世大魚見孟津

長數百步頭在南岸尾在中渚

方輿紀要河中渚又有

三渚之名晉永嘉末劉聰子粲攻晉故司徒傅祗于三渚

卽此

後魏陶渚

方輿紀要陶渚在河陰西北三里南北長堤之

外爾朱榮謀誅百官請魏主子攸西循河西至陶渚

按故河陰城見今孟津縣水經注孟津亦曰陶河曹魏時杜幾試樓船于孟津覆于陶河杜佑曰河陽縣西南十三里許有古遮馬堤卽是其處陶或作洶

後魏高渚

方輿紀要在孟津縣西亦黃河津渡處北魏胡

太后之亂爾朱榮舉兵至河內迎長樂王子攸于洛陽子

攸潛自高渚渡河會榮于河陽亦曰雷陂

後魏馬渚

方輿紀要在孟津縣西故洛城北亦黃河渡處

也後魏永安二年爾朱榮奉魏主子攸南討元顥顥列兵

沿河固守北軍無船不得渡伏波將軍楊標與其族居馬

渚自言有小船數艘求為鄉道榮遂命爾朱兆等縛材為

棧自馬渚西硤石夜渡襲擊顥子冠擒之顥軍遂潰三年

爾朱世隆犯洛李苗募人從馬渚上流縱火船焚河橋世

隆北遁

唐河南渚

通鑑李光弼守河陽史思明引兵攻河陽思明

有良馬千餘匹每日出於河南渚浴之循環不休光弼命

索軍中牝馬得五百匹繫其駒而出之思明馬見之悉浮

渡河盡驅入城

以上孟津

明洛水防

方輿紀要洪武二十九年洛河泛溢漂沒宜陽

廬舍因築防于水側焉

宜陽

明宣利四渠

方輿紀要宣利渠在永寧縣西三里又有新

興渠在縣西二里萬箱渠在縣西一里龍頭渠在縣西四

十五里皆修洛水以溉田甚為民利

永寧

明伊陽渠

方輿紀要在嵩縣東十里分伊水以溉田

明永定諸渠

方輿紀要在嵩縣南六里又有鳴臯順陽濟

民等渠皆洪武中邑民分引伊水溉田至今為利

溝渠

按河南郡自洛陽伊洛諸渠外率皆山縣水流山澗泉發澗底或伏流石罅時見時隱水不為民利然善興利者或于上流引水傍崖行就寬平處皆可溉田以為民利

以上嵩縣

之六十七終

河南府志卷之六十八

古蹟志十四

關塞

中堡

關塞

漢洛陽四關

文選鮑昭樂府升高臨四關注陸士衡洛陽

記漢洛陽四關東成臯關南伊闕關西函谷關北孟津關

一云南有輶轅伊闕

東京賦盟津達其後大谷通其前廻行道乎

伊闕邪徑捷乎輶轅

按洛陽四塞險固居中制外周公營洛固取天下道里之均亦天下形勝莫尚之地也然從來論者謂洛陽四面受敵為天下所必爭兵法所謂衢地者是也不可居夫天下有事所以必爭洛陽者正以洛陽形勝莫尚爭洛陽實以爭天下耳周公之東征也先居東都宣王之

中興也講武東都秦以函谷澠池之險既得宜陽韓又

獻成臯鞏而遂以蠶食天下漢高之制楚也以據成臯鞏洛之險下及五代唐宋以來莫不爭險奪隘於洛陽險要之地以取天下是豈不可據而有而姑以爭之耶特無可以制天下之命者而欲區區據洛陽形勝以號召天下則不可所謂制天下之命者有二一曰德一曰勢德有盛衰周公營洛而治平王東遷而弱是已勢有強弱秦以據險而興韓以據險而亡是已夫德盛者險不足言矣其據險以爭天下而其得失勝敗關於勢者又不可一端而盡方輿紀要曰守關中守河北乃所以守河南也自古及今河南之禍由於關中者什之七由於河北者什之九秦人以關中併韓魏漢以關中定三河苻秦以關中亡慕容燕宇文周以關中亡高齊謂關中不足以制河南之命乎元魏之禍爾朱榮自河北來爾朱兆自河北來高歡亦自河北來安史以河北倡亂而河南兩見破殘存勗發憤太原而朱梁卒為夷滅謂河北猶不足以制河南之命乎此言洛陽不可孤立必先得關中或河北洛陽乃可據而有故漢高先定關中乃保成臯光武先定河北乃事洛陽欲守洛陽者未有無關中河北之固而可以獨存此其大勢也其或以洛陽定關中則必與關中爭崤函之險春秋晉敗秦師於

崤崤屬晉也漢赤眉自三輔引而東馮異大破赤眉於崤底崤屬漢也洛陽西有崤險再西而守函谷之險則關中失其險矣唐李光弼不守洛陽而守河陽河陽洛陽北關也守河陽以制河北而河北失其險矣善守險者制人而不制于人是又方輿紀要所未及者也大抵洛陽之險可用以進取而不可守以待敵可以制一面之騷動而不可以支四方之攻圍或守之而不足以當天下之爭或爭之而即以制天下之命勿謂四面受敵而于洛陽險要遂置而弗講也

漢八關 靈帝紀中平元年三月戊申置八關都尉官注謂

函谷廣成伊闕大谷轅轅旋門小平津孟津也

按舊函谷關在靈寶新函關在新安廣成關在新城伊闕在洛陽南大谷今洛陽水泉口轅轅今嶺口旋門在成臯西南十數里與鞏接界小平津今入鞏舊屬孟津其置八關都尉互詳都邑下

隋關官 隋書地理志河南帶郡有關官

河南府志

卷之二十八 古蹟志

關塞

唐河南關

唐書地理志河南之河陽轅轅陸渾伊關高門

松陽鵝鵠大谷

按地理志河南十五而屬河南者凡八又河北二十四有孟之河陽是河陽有二關兩隸也高門三關在永寧○以上總載河南關塞下乃分載各縣

周闕塞

春秋昭二十六年傳

晉躒趙鞅帥師納王使女寬

守闕塞定六年傳鄭伐周闕外

方輿紀要戰國策秦攻

魏將犀武軍于伊闕進兵攻周既而犀武敗于伊闕史記

周赧王二十四年蘇厲謂秦將出塞攻梁又秦昭王十四

年白起攻韓魏之師于伊闕四十一年西周背秦與諸侯

約縱將天下銳兵出伊闕攻秦令秦毋得通陽城魏史伊

闕以南大山長谷蠻多居之魏因以伊川上豪李長壽為

防蠻都督隋大業九年楊元感作亂圍東都分兵守伊闕

道唐初討王世充史萬寶自宜陽南據龍門建中四年李

希烈叛遊兵掠至伊闕元和十一年淮西叛屢犯東畿

討兵屯伊闕以備之宋祁曰伊闕洛陽南面之險也自

汝潁北出必道伊闕其間山谷相連阻阨可恃元末土民

築點者往往置寨于此西連商洛東出汝潁隨地立名多

至數十徐達收中原次第平定

漢大谷關

方輿紀要靈帝時八關之一也初平二年孫堅

討董卓進軍大谷距洛陽九十里堅蓋軍于登封縣界王

世充置谷州以在大谷口而名

按唐地理志潁陽西北有大谷故關章懷太子曰白嵩陽縣西北出八十五里對故洛陽城蓋大谷接洛陽登封界故所隸不同又明史地理志洛陽東南有大谷谷口有關是近代猶設關于此也

皇門關 方輿紀要關在故洛城穀門上亦曰皇門橋晉惠

帝建潘岳西征賦所云秋馬皇門治也唐志作高門關

按唐志所謂高門關者在長水縣長水入今承寧承寧自有高門關于故洛城皇門橋本不一地方輿紀要地理誤又水經注

以上洛陽

延壽關 方輿紀要縣南三十五里晉永康二年齊主問

舉兵許昌討趙王倫倫遣兵出延壽關以拒之或謂之延

壽城嵩山記王子晉學道于洛鹿澗澗旁有靈臺塢即延

壽城

按晉志新城有延壽關新城入今嵩邑去偃師延壽城尚百餘里晉志當無誤然以齊王問舉兵許昌趙王倫出兵拒之自許昌抵洛道由偃師不由嵩縣則方輿紀要謂在偃師亦自有據

隋關官 隋地理志偃師開皇十六年置有關官

按隋志有關官不言何關唐志載偃師有河陽故關當是因隋之舊 以上偃師

古轅轅關 春秋襄二十一年傳晉欒盈奔楚過周王使候

出諸轅轅 文選薛綜注轅轅坂十二曲道將去復還故

曰轅轅 方輿紀要戰國策張儀曰秦下兵三川塞轅轅

緱氏之口史記沛公伐秦南出轅轅克之武帝時淮南王

安謀反欲塞轅轅伊闕之道建武九年帝幸緱氏登轅轅

靈帝時為河南八關之一建安初曹操奉獻帝遷許從轅
 轅而東晉懷帝永嘉二年羣盜王彌自許昌入轅轅敗官
 軍于伊北遂逼洛陽屯于津陽門三年劉淵使王彌等復
 寇洛陽不克乃出轅轅掠豫苑而東四年劉聰使其子粲
 等犯洛陽粲出轅轅掠梁陳汝潁間五年劉曜石勒等陷
 洛陽勒引兵出轅轅屯許昌後魏永安三年元顥入洛既
 而敗于河橋輕騎南走自轅轅南出至臨潁為人所殺唐
 武德二年討王世充王君廓攻轅轅克之王世充遣將魏
 隱來救為君廓所敗遂東徇地至管城而還四年王君廓
 與王世充將單雄信等相持于洛口世民援之至轅轅雄

信等遁去乾符元年王巢侵逼東都詔發兵守轅轅伊關
 河陰武牢孔穎達曰轅轅山在緱氏縣東南三十里道路
 險阨自古為控守處明史地理志鞏縣西南有轅轅山
 上有關

按後漢地理志緱氏有轅轅關緱氏入今偃師是轅轅
 宜隸偃師也又晉地理志陽城有鄂坂關即轅轅陽城
 入今登封是轅轅又隸登封也惟明史以轅轅關隸鞏
 今關雖廢而疆域則一因明之舊地固隸鞏而與偃師
 登封二
 縣接界

漢小平津關 方輿紀要靈帝時八關之一袁紹誅宦官中
 常侍張讓等將帝步出穀門至小平津晉永嘉末傅祗保
 盟津小城即小平津劉聰遣劉粲以步騎十萬屯小平津

慕容暉遣將呂護攻洛陽退守小平津後魏嘗講武於小平津爾朱榮舉兵胡太后遣費穆屯小平津拒之

按紀要以小平津入孟津今據名勝志入鞏互詳都邑小平城

黑石關 **方輿紀要**隋末王世充與李密相持世充夜渡洛

水營于黑石明日分兵守營自將精兵陳于洛北李密渡

洛逆戰而敗復渡洛趨黑石世充還為密所敗元致和初

陝西諸王澗不花等討燕帖木兒之亂進至鞏縣黑石渡

大敗河南兵遂克虎牢關上都已陷而還 **明史地理志**

鞏縣西南有黑石渡巡檢司

按黑石山名在鞏縣西南洛水東與卽嶺夾岸相對如門洛水出其中為東西京咽喉舟車轉輸冠蓋往來皆

出于此明設巡檢司曰黑石關亦曰黑石渡洛陽東有成臯鞏洛之險今成臯入泚水而鞏洛之險無過黑石固留心險要者所宜加之意耳

元大栗關 **方輿紀要**大栗樹關在鞏縣東南三十里元時

置 以上鞏縣

漢孟津關 **方輿紀要**東漢初拜馮異為孟津將軍規取洛

陽永初五年先零羌寇河東至河內詔朱寵將兵屯孟津

以備之中平末何進謀誅宦官使武猛都尉丁原將兵寇

河內燒孟津火照洛陽城中

按孟津何進入關之一漢以名關不名縣北阻大河南負卽嶺為洛北險要之地

唐河陽關 **唐書地理志**偃師有河陽故關

按河陽故關唐時地入偃師今為孟津河陽之名宜在
河北孟縣孟津在大河南何得有河陽關也蓋河陽三
城一在河北岸一在河南岸一在河中相為接應故南
北置關皆得曰河陽也三城者魏太和十七年遂洛命
作河橋河北側岸有二城相對置北中郎府戍守之因
謂之北中城魏都洛陽以北中為重地北中不守則可
平行至洛陽武泰初爾朱榮自晉陽南下胡太后遣將
守河橋及北中城以拒之既而都督李神軌至河橋聞
北中不守即遁還永安三年魏主誅爾朱榮遣將軍奚
毅等將兵鎮北中東魏太象三年築中渾城及南城中
渾在河中渚時仍置河陽關于其地高歡使潘樂屯北
中城高永樂守南城宇文周大舉伐齊周主邕自將出
河陽拔河陰大城圍中渾二旬不下乃還隋開皇初因
東魏行臺置河陽宮于河陽城內唐乾元二年九節度
之師潰于相州郭子儀以朔方軍斷河陽橋保東京眾
議欲損東京退保蒲陝朔方都虞侯張周濟定計守河
陽役所部築南北兩城而守之蓋因舊城增築也既而
史思明陷汴鄭將逼洛陽李光弼以洛城難守議移軍
河陽北連澤潞利則進取不利則退守表裏相應使賊
不敢西侵為猿臂之勢遂率士馬而東守河陽思明築

弓城於河陽南以拒光弼欲泛大船燒河橋又悉力攻
南城皆不克時光弼屯中渾應援南北兩城思明進攻
中渾敗却又敗思明於河陽西渚是時賊雖入洛而渾
光弼兵威南不出百里西不越畿內陝州得修戎溝關
輔無虞光弼保河陽之力也建中二年置河陽三城節
度自是常為重鎮光啟三年河南尹張全義襲河陽節
度李罕之入其三城罕之走澤州既而河陽歸于朱温
河東屢爭河陽不克朱温自是益強唐主議北討引軍
至河陽盧文紀曰河陽天下津要車駕宜留此鎮撫南
北石晉天福九年契丹入寇至黎陽命西京留守安彥
臧守河陽劉漢乾祐末李驥說太原留守引兵逾太行
據孟津宋靖康末金將粘沒喝自太原長驅而南前鋒
渡孟津粘沒喝旋至懷州頓河陽紹興六年岳飛請提
兵趨河陽據河陽陝府潼關為恢復之計不用紹定四
年蒙古窩闊台攻金汴京引軍自河清渡河入鄭州明
初取山西河南守將馮宗異分道出河陽克武陟下懷
慶河陽蓋天下之腰膂南北之禁喉也今三城雖不盡
入孟津而設險守要南北實相表裏故並詳三城於河
陽關

以上孟津

明趙保鎮關

明史地理志宜陽西南有趙保鎮巡檢司

明木冊鎮關

明史地理志宜陽西南有木冊鎮巡檢司

按方輿紀要目二鎮為關趙保在縣西南三十里木冊在縣西南百二十里木作穆

以上宜陽

晉鄂坂關

晉書地理志陽城有鄂坂關

方輿紀要鄂坂

關東出陽翟許昌之道晉齊王罔舉兵許昌討趙王倫倫遣兵出鄂坂關拒之梁大通三年陳慶之送元穎北還至梁國魏人分兵鎮滎陽虎牢又使爾朱世承鎮鄂坂以備之唐乾元二年史思明窺洛李光弼議去洛守河陽或以東京帝宅不可不守光弼曰守之則汜水嶠嶺龍門皆應置兵是也

按鄂坂即古轅轅今人猶呼轅轅為嶠嶺口而方輿紀要與明史地理志皆謂鄂坂關在登封東南箕山上夫箕山上關為石羊關乃古陽城關也與轅轅相去數十里亦險要可守豈古人守轅轅必並守箕山而箕山遂冒鄂坂之名歟石羊陽城關各並詳下

魏陽城關

石羊關

魏書地形志孝昌中分陽城置康城

石陽城關

方輿紀要石羊關在登封東南四十里崖石

險峻僅容一車

按石羊即古陽城關在箕山上方輿紀要既以鄂坂屬箕山而又列石羊何耶

以上登封

古嶠塞

春秋僖三十三年晉人及姜戎敗秦師於嶠左傳

嶠有二陵焉南陵夏后皐之墓也北陵文王之所避風雨

也公羊傳嶠之嶽岩

呂氏春秋九塞嶠其一也

方輿

紀要三峭山亦曰二峭在今永寧縣北六十里謂之峭塞
戰國策所稱澠隘之塞也秦昭王初楚圍雍氏秦下師於
峭以救韓張儀說趙曰秦軍軍於澠池願渡河逾漳戰邯
鄲下蘇代謂甘茂自峭塞至鬼谷一作槐谷其地形險易皆明
知之漢景帝三年吳楚叛周亞夫出關討之趙涉說曰吳
王懷輯死士必置奸人於峭澠阨間亞夫因出武關而
東東漢建武三年馮異大破赤眉於峭底建安十九年龐
德破賊張白騎於兩峭間水經注峭有盤峭石峭干峭之
山故又曰三峭晉大寧三年後趙石生屯洛陽劉曜使其
黨劉岳趨孟津呼延謨自峭澠而東合諸軍攻洛陽興寧

三年燕慕容恪陷洛陽畧地至峭岷關中大震後魏永熙
三年高歡自晉陽犯洛宇文泰遣將赴援會魏主西走於
峭中又韋孝寬襲破東魏將段琛等於宜陽峭澠遂清元
和志自東峭至西峭三十五里東峭長阪數里峻阜絕澗
車不得方軌西峭純是石阪十二里險不異東峭此二峭
皆在秦關之東漢關之西輿地廣記二峭山連入硤石界
自古險要之地也

按三峭入永寧澠池陝州三界楊升庵春秋地名考二
峭正義曰俗名土硤石硤其後轉爲土濠石濠杜子美
有石濠吏詩宋建炎二年金人自同華東走石濠卽舊
峭縣而澠池有土濠鎮乃土硤也硤石入今陝州界

唐高門關

唐書地理志長水西有高門關

方輿紀要高

門關在永寧西十八盤嶺北

明史地理志永寧有高門

關巡檢司

唐松陽關

唐書地理志長水有松陽關

方輿紀要永寧

西八十里有崇陽鎮關有巡司

按唐松陽方輿紀要作崇陽明史地理志亦作崇陽實一地

唐鵝鵠關

唐書地理志長水有鵝鵠關

方輿紀要在永

寧縣西鵝鵠山唐所建也今廢

明峭底關

明史地理志永寧東有峭底關巡檢司

方輿

紀要峭底在永寧西北七十里即峭谷之底也亦曰峭坂

一名澗池馮異大破赤眉于此明初置巡司後革

按峭底明史以為在縣東方輿紀要以為在縣西北明史誤

以上永寧

漢函谷新關

漢書武帝紀元鼎三年冬徙函谷關于新安

以故關為宏農縣注應劭曰時樓船將軍楊僕數有大功

耻為關外民上書乞徙東關以家財給其用度帝意亦好

廣濶于是徙關于新安去宏農三百里至今謂之新關又

天漢二年冬十一月詔關都尉曰今豪桀多遠交依東方

羣盜其謹察出入者成帝紀陽朔二年秋關中大水流

民欲入函谷天井壺口五阮關者勿苛留後漢光武紀

建武十九年復置函谷關都尉王霸傳霸為討虜將軍

建武八年屯函谷關擊滎陽中牟賊平之通典魏正始

元年宏農太守孟康上言移函谷關更號大峭關又為金關
水經注散關障自南山橫洛水北屬于河皆關塞也
師楊僕家僮所築 方輿紀要函谷新關在新安東二里

按魏所號大峭當移在永寧澠池間水經注于函谷又有散關之目散關在陳倉何得以目函谷考抱朴子老子西遊遇關令尹喜于散關據列仙傳關尹望氣遇老子乃在函谷豈函谷亦通得散關之名與無關尹望氣知真人當過與孟嘗君客能為鷄鳴出關俱在秦函谷關非漢函谷新關也秦關在靈寶漢關在新安入新安不得牽秦以前事或有終軍棄繻者亦不在新安蓋終軍當武帝時據列傳入關在元狩前而武帝移關乃在元鼎三年元鼎在元狩後知棄繻不在新關也新關有郭丹封符亭與棄繻畧同東觀漢記曰郭丹初之長安從宛人陳兆買入關符以入函谷關既入封符語人曰不乘使者車不出關丹自從入關後不歸家十二年後奉使乃出關竟如本心又一九東封事亦指新關東觀漢記曰隗囂將王元謂囂曰請以一丸泥為大王東

封函谷關此萬世一時也

新安

明南村關 明史地理志澠池西北有南村巡檢司 方輿

紀要南村關在澠池西北九十七里有濟民渡通山西垣

曲設巡司以守之

按峭塞本在澠池連陝州永寧二境明于陝州設硤石關于永寧設峭底關而澠池通關陝之路初未設關今澠池有土濠鎮為要地矣其明時設關之可記者惟南村通山西一關耳

澠池

漢陸渾關 前漢地理志陸渾春秋遷陸渾戎于此有關

方輿紀要關在嵩縣北七十里更始二年赤眉賊西攻長

安分其眾為二部一自武關一自陸渾關兩道西入蓋由

陸渾西北趨函谷道也

按玉海樊崇逢安自武關入徐宣等自陸渾關入

晉延壽關

晉書地理志新城有延壽關故成蠻子之國

按延壽關互詳偃師

唐陸渾關

伊闕關

唐書地理志陸渾有漢故關伊闕有

伊闕故關

按今伊闕縣入嵩縣伊闕關入洛陽

明舊縣鎮關

方輿紀要舊縣鎮關在嵩縣西南七十里洪

武三年建有巡司

明白楊關

樓子關

方輿紀要白楊關在嵩縣北有戍兵

又樓子關在縣西南百里

按白楊關見地輿記為嵩與宜陽之界

明沒大嶺關

明史地理志嵩縣有沒大嶺巡檢司

按嵩志沒大嶺亦名火石關俗呼過風樓由魯山入嵩要隘距縣一百八十里

以上嵩

屯堡

防禦壘壁等並載

漢都亭屯

後漢靈帝紀中平元年以河南尹何進為大將

軍將兵屯都亭注都亭在洛陽

晉石梁屯

方輿紀要在故洛城東洛水北永嘉末將軍魏

浚聚流民屯洛北石梁塢劉琨在并州承制假浚河南尹建興初劉曜攻陷之大寧三年後趙將石生據金鏞劉曜遣將劉岳攻之岳拔孟津石梁二戍未幾石虎圍岳于石

梁尋拔之

晉宣武塲 方輿紀要在故洛城大夏門東北其南宣武觀
晉河間王顥之亂帝自十三里橋還軍宣武塲

晉張方壘 方輿紀要在故洛城西七里晉齊王冏將張方
所築後遂為戍守之所永嘉五年劉聰遣呼延宴等寇洛
陽宴留輜重于張方故壘是也

隋卽山九營屯 方輿紀要大業十三年李密據洛口越王
侗運回洛倉米入城分兵屯豐都市上春門及北卽山為
九營以備密

隋唐卽山諸屯 方輿紀要隋大業九年楊元感圍東都代

王侑自長安使衛文昇赴救文昇渡灑水屯于卽山之陽
又李密據金墉擁兵三十萬屯于北卽東都出兵以拒之
為所敗唐武德初王世充攻密偃師密自金墉引精兵出
偃師阻卽山以待之世充夜遣二百餘騎潛入卽山伏谿
谷中及戰伏兵發乘高壓密營縱火焚廬舍密眾大潰三
年世民攻世充大兵屯于北卽以逼洛陽世充出戰臨穀
水拒唐兵世民陳于北卽登魏宣武陵望之知賊可擊渡
水大戰賊敗走

按宣武陵北魏主恪陵也魏書世宗紀諡曰宣武皇帝
廟號世宗墓景陵曰宣武陵以諡配陵也在北卽山上
近府城西北隅

隋千金堡 [唐書羅士信傳] 師次洛陽攻千金堡堡有惡言
詢軍士信怒夜遣百人載嬰兒唬譟堡下若自東都出奔
者既而陽悟曰非也此千金堡耳因散去堡兵開門追掠
士信伏入屠之

隋青城堡 [方輿紀要] 青城堡隋齋宮也亦曰青城堡唐武
德二年行軍總管羅士信攻王世充夜入洛陽外郭焚清
化里既又拔青城堡

五代梁夾馬營 [方輿紀要] 府東北二里朱梁開平初置營
于此有指揮使掌之後因而不廢宋太祖誕生焉真宗時
建爲應天寺又改爲發祥寺
以上洛陽

晉豆田壁 [方輿紀要] 晉太安二年成都王穎引兵向內
幸偃師舍于豆田是也胡氏曰滎洛之間有麻田豆田大
抵因人所種菘而名姚襄與苻秦將李歷戰于麻田襄大
敗其地亦在洛陽成臯間也

唐轘轅府 [唐書地理志] 河南郡有府三十九曰武定復梁
康城栢林巖邑陽樊王陽永喜邵南慕善政教鞏洛伊陽
懷音軹城洛汭邾鄆洛川洛泉通谷潁源宜陽金谷王屋
成臯夏邑原邑原城鶴臺函谷千秋同軌餞濟温城具茨

寶圖鈞臺承雲轘轅

按府者府兵也河南府兵三十九如王屋鈞臺等今既
不隸河南而河南如邾鄆洛川又復不存府名無跡可

記惟偃師近轅轅者有府店鎮乃唐置轅
轅府兵處也故並記之以存府兵之制

以上偃師

漢劉備寨屯

李通志

劉備寨在鞏縣西南原良保昔劉關

張伐呂布屯兵于此

劉宋百谷塢堡

鉤鎖壘

水經注休水又北流注于洛水

洛水又東逕百谷塢北戴延之西征記曰塢在川南因高

為塢高一十餘丈劉武王西入長安舟師所堡也

方輿

紀要義熙十二年劉裕伐秦軍至成臯秦姚洸鎮洛陽遣

趙元屯守栢谷塢毛德祖擊敗之元熙初司馬楚之避劉

裕逃亡河南屯栢谷塢元魏景明二年咸陽王禧謀為變

事泄自洪池東南走濟洛至栢谷塢追兵擒之東魏武定

初高季密以虎牢降魏宇文泰帥軍應之至洛陽遣于謹

攻栢谷拔之隋大業十四年李密圍東都栢谷降密又朱

書武帝西征營于栢塢西有三壘相連如鎖名鉤鎖壘云

按水經注百谷塢即栢谷塢注記百谷塢在休水東且
舟師所堡必近洛水南今鞏偃以休水為界休水出澗
谷將入洛東三里有一百餘丈北望洛水即古屯
兵之處其地西連乾溝東西寨如鉤鎖然即鉤鎖壘也
各勝志及方輿紀要皆目二地為偃師蓋因休水入偃
而誤耳偃志不知百谷即鞏之百峪而以緱氏之栢圻
增當之其地重嶺絕澗與洛水
中隔景山知非舟師所堡矣

晉洛口屯

方輿紀要晉大興初滎陽太守李矩使郭誦救

趙固于洛陽屯洛泃誦遣其將耿稚夜濟河襲劉粲大敗

之大寧三年後趙石虎敗劉曜將劉岳于洛西蓋在洛口

西也後魏永熙末高歡自晉陽引軍渡河衆議欲守洛口
死戰魏主不能從隋末李密據洛口越王侗使諸軍擊密
來洛水相守既而王世充與密相持于洛水上屬爲密所
敗義寧二年世充擊密于洛北敗之遂屯鞏北復渡洛擊
密軍敗溺者甚衆

隋橫嶺屯

百花谷屯

方輿紀要橫嶺縣東三十里接汜

水縣界李密據興洛倉隋遣東都兵討之又使虎牢鎮將
裴仁基自汜水西入以掩其後密分兵伏橫嶺下以待仁
基是也又百花谷在縣東南二十餘里接汜水西境裴仁
基討李密失期不進屯于百花谷

元季山寨諸屯

方輿紀要天堂山砦在鞏縣東南又有應

耳鷄翎凌霄黑山等山寨俱元季鄉豪屯聚處

以鞏縣

周鉤陳壘

水經注河南有鉤陳壘世傳武王伐紂八百諸

侯所會處尚書所謂不期同時也紫微有鉤陳之宿主圖
訟兵陣故遁甲攻取之法以所攻神與各各山陰制所
臨之辰則秩禽敵是以壘資其名矣

漢高祖講武塲

水經河水逕平縣故城北注俗謂之小平

有高祖講武塲

唐橫水柵

方輿紀要橫水店在孟津西唐寶應元年僕固

懷恩討史朝義陳于橫水賊立柵自固懷恩陳于西原以

當之遣驍騎回繞並南山出柵東北夾擊之賊大敗又轉戰于昭覺寺石榴園老君廟皆敗之賊人馬相蹂踐填滿尚書谷金人疆域圖孟津縣有橫水店昭覺寺 孟津

晉石梁塢屯 一泉塢屯 [方輿紀要] 晉永嘉末魏浚屯洛

北石梁塢族子該聚眾屯一泉塢大興初該始自宜陽帥眾遷新野蓋其地險固可憑也一泉塢又名乙泉戍慕容緯時戍此以備秦慕容垂奔秦乙泉戍主吳歸追之至閿鄉是也宇文周時亦置重兵于此以備齊

西魏張白塢戍 [方輿紀要] 塢為漢末張白騎所據西魏大統四年宇文太置戍以拒東魏使權景宣守之

後周建安四戍 [北史斛律光傳] 周遣其柱國紇干廣畧圍

宜陽光率步騎五萬赴之戰于城下取周建安等四戍捕千餘人而還

北齊文侯鎮柵 [方輿紀要] 斛律光出洛陽擊斬周將栢谷戍主薛禹生棄城走光遂取文侯鎮立柵置戍而還鎮蓋與栢谷城相近 以上宣陽

漢末陽城屯 [方輿紀要] 初平二年袁術表孫堅領豫州刺史史屯陽城袁紹尋遣周昂為豫州刺史屯陽城堅擊昂走之

唐少林僧兵 [方輿紀要] 少林寺背五郛峯元魏所建歷代

嘗修之近代所稱少林寺之僧兵也

按唐太宗告栢谷塢少林寺上座書法師等克建嘉猷同歸福地擒彼寇孽廓茲淨土今東都危急旦夕殄除並宜勉終茂功以垂令範此少林僧兵所由來也

以上登封

後魏同軌防 [方輿紀要永寧縣東西魏置同軌防後周為

同軌郡

後周黃櫨戍 [通志周當全盛爭戰之際黃櫨三城置兵以

備東軍

唐莎柵 [方輿紀要在永寧東唐乾元上元間衛伯玉等屢

破史思明將李懷仁于永寧莎柵之間 以上永寧

白起壘 [水經注壘在缺門東一十五里壘側有塢故治

宮所在 [方輿紀要白起嘗屯兵于此因名

燕慕容屯 [名勝志慕容山在新安治後燕慕容垂屯軍於

此故名

後周通洛防 [玉海故函關城後周保定中改名通洛防

[通志周於通洛防置兵以備東軍

唐碓石堡 [水經注穀水又東逕于雍谷溪回岫縈紆石路

阻峽故亦有峽石之稱矣 [方輿紀要碓石在新安縣西

唐武德四年羅士信討王世充拔其碓石堡是也

按河南郡碓石有三一在孟津後魏爾朱榮自馬渚西碓石夜渡者也為碓石渡一入陝州唐貞觀移嶠縣治碓石塢者也為碓石縣一在新安唐羅士信討王世充所拔者也為碓石堡碓石水經注作峽石在千秋亭下

屯堡

缺門上注曰亦有峽石則道元時峽石之稱已不一地矣

唐缺門營

方輿紀要唐時有缺門營以山名也開元八年

契丹寇營州發關中卒援之宿缺門營穀水上夜半山水

暴至萬餘人皆溺死乾元二年郭子儀自相州潰遂至河

陽軍中相驚又奔缺門即此

以上新安

漢澠池故城屯

方輿紀要澠池故城在今縣西初平二年

董卓為孫堅所敗自雒陽却屯澠池聚兵于陝堅入洛陽

分兵出新安澠池間以要卓既而卓使董越屯澠池引還

長安晉永興三年東河王越等遣軍迎車駕于關中以周

馥為司隸校尉假節督諸軍屯澠池

姚秦蠡城戍

方輿紀要姚秦以宏農太守戍蠡城後毛德

祖擊擒將尹雅于蠡城是也

以上澠池

北齊孔城防

通志孔城防今伊闕縣東南故城是也北齊

置兵以防周寇

東魏伏流柵

方輿紀要東魏李延孫與韋法保連兵置柵

於伏流

宋九臯寨

奉牛山屯

方輿紀要宋翟興破賊楊進于九

臯山上有九臯寨山接汝州界又奉牛山在縣東三十里

翟興屯伊陽之奉牛山劉豫誘其下賊殺之即此

明嵩縣守禦

李通志嵩縣守備以都指揮體統行事指揮

領之佳劄本縣洪武三年設轄衛二曰河南曰南陽守禦

千百戶所五日嵩縣曰鄧州曰唐縣曰永寧曰盧氏

按明于嵩縣設守禦千戶所而守備指揮即住劄本縣以轄諸禦所則嵩固重地也 以上嵩縣

宋大梁縣 奉天山所

效為和

東縣外燕酬

晉天以朝儀賦

冰清其潔烈

斷雲散餘英 蘇子益其出

河南通志卷之六十九

河南通志卷之六十九

古蹟志十五 津渡 橋梁

津渡

隋天津 重津 大業雜記出端門至洛水有天津過洛二

白步又疏洛水為重津

洛陽

漢五社津 水經河水又東過鞏縣北注河水於此有五社

渡為五社津建武元年朱鮪遣持節使者賈彊討難將軍

蘇茂將三萬人從五社津渡攻溫馮異遣校尉與寇恂合

擊之大敗追至河上生擒萬餘人投河而死者數千人

方輿紀要建武初遣將軍耿弇等軍五社津備滎陽以東

而使吳漢等圍洛陽是也

漢小平津

互詳都邑關塞

隋黑石渡

方輿紀要鞏縣西南二十五里洛水津濟處隋

宋王世充與李密相持世充夜渡洛水營于黑石元致和

初陝西諸王澗不花等進至鞏縣黑石渡

宋訾店渡

方輿紀要宋景德四年造訾店渡橋

明神堤渡

洛口渡 李通志神堤渡在鞏縣北洛口渡在

鞏縣東

按訾店黑石神堤洛口皆洛水濟渡處訾店渡詳後橋梁門

明裴峪渡

李通志裴峪渡在鞏縣西

按裴峪渡疑即黃河小平津渡也詳前都邑門

以上鞏縣

古孟津

水經注河水自是有盟津之目論衡曰武王伐紂

升舟陽侯波起疾風逆流武王操黃鉞而麾之風波畢除

中流白魚入於舟熾以告天與八百諸侯咸同此盟尚書

所謂不謀同辭也故曰孟津亦曰盟津尚書所謂東至于

孟津者也

按行水金鑑據尚書孔氏傳孟津在洛陽北都道所湊古今以為津其地當在今河南懷慶府孟縣西南三十里非河南府之孟津縣也意謂正當洛陽北乃與都道所湊合若孟津在洛陽東北其非北方入洛濟渡之處不知武王渡河伐紂正在東北其時洛邑未營更不得援都道所湊為言而指為洛陽正北也洛陽正北乃漢以後河陽渡耳其地亦屬孟津可通得孟津之目不得反謂古孟津在西不在東也且武王伐紂歸渡河偃息師

徒遂名其地曰偃師若古孟津不在今孟津縣則渡河直至洛陽何以洛陽東有偃師乎益知孟津即今孟津縣也。又按禹貢雖指引林少穎云河自華陰至於底柱夾兩山之間其流皆湍悍至於孟津然後其勢稍緩可以橫舟而渡也。渭按大陽縣南有茅津秦穆公封殺尸自此濟河不待至河陽始可渡林說非是夫謂孟津上津渡處甚多誠然然武王之所以必渡孟津者又自有說孟津上雖可渡但夾岸偏仄非會諸侯之處東至孟津而八百來歸雖曰不期而會亦武王所引為同盟者也。

漢平陰津

史記高祖本紀漢王從臨晉渡魏王豹將兵從

下河內虜殷王置河內郡南渡平陰津至雒陽新城三老

董公遮說漢王以義帝死故漢王聞之袒而大哭遂為義

帝發喪

按平陰在今孟津西已辨在都邑門至董公說漢王處史記言渡平陰津至雒陽乃遮說漢王是遮說在雒陽

不在平陰也而水經注以為在平陰者蓋漢高未定天下平陰未置縣渡平陰即屬雒陽地故史記以為至雒陽遮說水經注以為在平陰遮說也

魏高平津

名勝志孟津一名高平津明帝陵名本此

按高平津疑即富平津高富字譌耳但名勝志以高平為明帝陵名明帝陵在孟津縣內故津得其名今考水經注洛陽大石山阿有魏明帝高平陵不在孟津則名勝志所謂高平津明帝陵名本此者謬也

晉富平津

水經注孟津又曰富平津晉陽秋曰杜預造橋

於富平津所謂造舟為梁也

後魏委粟津

方輿紀要在孟津縣西黃河渡處也劉宋元

嘉七年後魏將安頡自委粟津濟攻宋金墉遂克之

按一統志委粟津在河南府城東北三十五里委粟山下今府東北山北垂臨河無委粟山考委粟山乃古

郊天之所在古洛城南伊洛間不得在黃河南岸如是則委粟津自為津名與委粟山無涉不得牽合

後魏硤石渡 方輿紀要在孟津縣西二十里亦黃河津濟

處後魏永安二年爾朱榮奉魏主子攸討元顥自馬渚西

硤石夜渡乃河陰之硤石也 明史地理志孟津西有硤

石津

按明史記硤石委粟又以為高渚馬渚陶渚皆黃河津濟處三渚併詳溝渠門故不列

後魏雷陂渡 齊書記帝遣侍中原子恭鎮河內爾朱兆舉

兵向京師子恭軍失利兆自雷陂涉渡擒莊宗於式乾殿

帝初以黃河奔急謂兆未得猝濟不意兆不由舟楫憑流

而渡是日水淺不及馬腹故及此難

金白坡渡 胡士傳白坡故河清縣河有石底歲旱水不能

尋丈國初以三千騎由此路趨汴是時縣廢為鎮宣宗南

遷河防上下千里常以此路為憂每冬日令洛陽一軍戍

之 李通志白坡渡在孟津縣西

采珠津 名勝志世說吳郡蔡洪入洛語洛人日夜光之珠

不必于孟津之河今河渚有采珠津 以上孟津

明洛河渡 李通志洛河渡在宜陽縣北 宜陽

明匡口渡 李通志匡口渡在新安縣東北 新安

明濟民渡 方輿紀要澗池西北九十七里有濟民渡路通

山西垣曲縣明設巡簡司以守之

按濟民渡互
詳南村關

澗池

橋梁

漢洛水浮橋

方輿紀要漢有洛水浮橋在故洛城南五里

司馬謀誅曹爽勒兵屯洛水浮橋

初學記洛陽魏晉以

前跨洛有浮橋

按漢時洛水貫城則洛水浮橋宜在城中何得曰城南五里有洛水浮橋後魏時穀水遶城洛水不貫城流於城南故水經注有城南洛水浮橋伽藍記有城南洛水永橋皆謂浮橋則浮橋者似屬後魏不屬漢然紀要謂漢洛水浮橋在城南五里亦自不安何也嘗行古洛陽城見今洛水行道似漢貫城舊迹非城南舊迹而城南又自有洛水行道循舊道而西至今府東二十里石嘴為今洛水行道石嘴東南洛水故道窳然勢卑下而新東似鑿成通洛水者竊意鑿此在秦漢時已然故漢高

從復道見諸將坐沙中偶語東漢建都洛水從西南入城故西南門曰滎陽門又意漢洛水貫城特分洛水之半其半猶遶城南貫城者曰洛水遶城者亦曰洛水故漢城南得有洛水浮橋也夫謂洛水分為二枝於諸書無所見又何以故蓋北枝入城以地勢求之別無他道南枝在城外又可以水經伊水入洛之處得之水經曰伊水又東北洛陽縣南北入于洛酈注曰伊水入洛在洛陽南員邱東大魏郊天之所桑欽漢人漢時洛水貫城而曰縣南入洛知城南別有一枝也至道元時穀水遶城洛水貫城一枝當絕獨有城南經流一枝而郊天之處猶在洛南今故洛城南邨聚有曰大郊者後魏郊天之處也又有東大郊亦曰大交蓋伊洛在員邱東交流處也郊交各有取義不得為一後魏時洛在城南而貫城故道已湮今洛水乃行貫城故道不由城南故道不知起于何時想隋開通濟渠即漢貫城故道至今遂為經流而伊水入洛亦在偃師南不在古洛城南矣

漢西城梁

水經注潁客之著春秋徐例言西城梁門枯水

處世謂之死穀是也

按西城者今府城西古王城也據水經注箋客當作容
隋經籍志漢公車徵士穎容著春秋釋例十卷穎容漢
人漢都在東故目王城為西城而西城梁
當在王城西今府西七里澗即其遺趾

漢建春門石橋 水經注 穀水逕建春門石橋下橋首建兩

石柱橋之右柱銘云陽嘉四年乙酉壬申詔書以城下漕

渠東通河濟南引江淮方貢委輸所由而至使中謁者魏

郡清淵馬憲監作石橋梁柱敦敕工匠盡要妙之巧攢立

重石累高周距橋工路博流通萬里云云河南尹邳崇隴

丞渤海重合雙福水曹掾中牟任防史王蔭史趙興將作

吏睢陽申翔道橋掾成畢卑國洛陽令江雙丞平陽降監

掾王騰之主石作左北平山仲二月起作八月畢成其水

依柱文自樂道里屈而東出陽梁 方輿紀要 唐乾元二

年史思明陷鄭州西窺洛陽李光弼去洛而遷河陽時則

遊騎已至石橋諸將請曰自洛城而北乎當石橋而進乎

光弼曰當石橋而進部曲堅整賊不敢逼又後唐同光四

年李嗣源入汴帝自汜水西還至石橋即上東門外之石

橋也

按伽藍記載建春門外石橋銘漢陽嘉四年將作大匠
馬憲造與水經注同又辨劉澄之山川古今記戴延之
西征記並云晉太康元年造失之遠矣東一里餘至東
石橋乃晉太康元年造澄之等見東石橋銘因以建春
門外石橋為太康所
造也東石橋見下

晉東石橋 伽藍記 東石橋南北而行晉太康元年造橋南

卽中朝牛馬市刑嵇康之所水經注穀水又東逕馬市石橋橋南有二石柱竝無文刻也

按伽藍記所記建春門外石橋凡三其但曰石橋者卽水經注所謂漢陽嘉石橋也在建春門下其曰東石橋者卽水經注所謂馬市石橋也在建春門東里餘二橋舊蹟俱在洛陽其曰七里橋者卽水經注所謂七里澗旅人橋也在今懷師其地猶名石橋二書所記三石橋畧同所異者伽藍記謂東石橋晉太康元年造又謂劉澄之見此橋銘是有文刻也而水經注以爲並無文刻豈道元未審厥文歟

晉舉門橋水經注舊瀆又東晉惠帝造石渠於水上謂之舉門橋潘岳西征賦曰秣馬舉門卽此處也

晉十三里橋方輿紀要自洛陽故城西至橋十三里因名晉太安二年成都王穎自鄴河間王顥自關中皆舉兵內

向帝如十三里橋張方尋攻洛陽爲長沙王乂所敗退屯十三里橋

後魏長分橋伽藍記出閭闔門城外七里長分橋中朝時以穀水浚急注於城下多壞民家立石橋以限之長則分流入洛故名曰長分橋或云晉河間王在長安遣張方征長沙王營軍于此因爲張方橋也未知孰是今民間語譌號爲張夫人橋朝士送迎多在此處

按長分橋分水入洛似卽水經注所言晉舉門橋之制也伽藍記又以爲卽張方橋考張方屯十三里橋長分去都城七里數亦不合恐不一地又伽藍記城西張方橋卽漢之夕陽亭也送別之所

後魏永橋伽藍記宣陽門外四里至洛水上作浮橋所謂

永橋也神龜中常景為勒銘南北兩岸有華表舉高二十丈華表上作鳳皇似欲冲天勢

後魏城西石梁 水經注穀水又東又結石梁跨水制城西梁也

按水經注記城西石梁於畢門橋下蓋在故洛城西北隅為穀水乘高枝分上下處下又錯簡右會金谷一說乃記西北角金墉城其記穀水入城曰乘高枝分上下歷故石橋東入城故石橋蓋漢上西門外石橋也後魏遷都徙門南側應自有石橋而舊門下石橋曰故石橋為穀水分枝入城之處穀水連城凡門外必皆有石橋水經注但記上西門外故石橋建春門外石橋與東陽門外石橋凡三耳
後魏東陽門石橋 水經注渠水歷司空府前逕太倉南東出陽門石橋下注陽渠

按東出陽門當作出東陽門互見溝渠

隋天津橋 方輿紀要在府城西南洛水上隋大業初遷都以洛水貫都有天漢之象因建此橋用大船連以鉄鎖南北夾起四樓名曰天津李密破回洛倉遂燒天津橋唐武后長壽中始命李德昭斃石為脚開元二十年又改造焉廣平王入東都陳兵于天津橋南宋建隆二年留守向拱重修斃以巨石基址甚固橫亘洛水為都城之勝 地輿記天津橋府城西南即邵雍聞鵲處

按方輿紀要并以後漢所建洛水浮橋在故洛城南者入天津誤

隋黃道橋 大業雜記黃道渠濶二十步上有黃道橋三道

按隋都城有石瀉口瀉三城池水下黃道渠唐武德
年王世充出右掖門臨洛水為陳唐將王懷文先為
充所獲引置左右忽起刺世充衷甲不入懷文走趨
唐軍至瀉口世充軍追獲殺之事關節義附見于此

隋重津橋 大業雜記重津渠濶四十步上有浮橋時開闢

以通樓船入苑

隋通仙橋 大業雜記甘泉渠疏洛入伊渠上有通仙橋五

道時人亦謂之五橋橋南北有華表長四丈各高百餘尺

按五橋即唐裴晉公所居之五橋也
在建國門外今府城西南十五里

隋通遠橋 大業雜記通遠橋跨漕渠南即通遠市

隋臨寰橋 大業雜記通遠市南臨洛水跨水有臨寰橋

隋龍鱗飛橋 大業雜記西苑十六並臨龍鱗渠渠百獨

二十步上跨飛橋

唐皇津橋 天津橋 玉海會要曰開元二十年四月二十

一日改造天津橋毀皇津橋合為一橋天寶元年二月廣

東都天津橋中橋石脚兩眼以便水勢

唐中橋 元和志中橋咸亨三年造

唐利涉橋 會要舊都城洛水天津之東有中橋利涉橋以

通行李

唐洛中橋 韋宏機傳營繕東都作宿羽高山等宮徙洛中

橋於長夏門廢利涉橋人便之 會要上元二年司農卿

韋宏機移中橋自立德坊西南置於安衆坊之左南當長

夏門上令於中橋南刻一方石列其年辰紀十六字蓋黃絹之辭也因廢利涉橋所省萬計

按洛中橋即前所謂中橋也但中橋造於咸亨年在立德坊西南所移洛中橋乃上元二年置於安衆坊左既有二地故別列之又李濂通志有上浮橋中浮橋下浮橋俱在府城西南不言何代蓋韋宏機未移中橋時天津橋中橋利涉橋有三橋之名天津為上浮橋中橋為中浮橋利涉為下浮橋道中橋移而利涉廢無下浮橋而尚存中浮橋舊名曰洛中橋且通志既列上浮橋而又別出天津橋殊不分曉

唐洛陽四橋 會要政和四年宋昇奏西京端門前考唐洛

陽圖舊有四橋曰穀水曰黃道在天津橋之北曰重津在南並為疏導洛水又橋之上十里有石堰曰分洛自唐以來引水入小河東南入伊

按天津重津黃道三橋唐因隋舊至穀水橋則起于唐

唐菜市橋 方輿紀要在府城東亦唐所置宋開寶九年郊

祀西京詔發卒五千自洛城菜市橋鑿渠抵漕口二十五

里餽運便之其後導以通汴

後唐蔣橋 方輿紀要蔣橋在城西穀水上後唐應順初潞

王從珂自陝趨洛至蔣橋百官班迎即此

宋七里橋 鎮國橋 文獻通考端拱二年七月洛水溢壞

七里鎮國二橋

明瀝橋 李通志舊名和平橋在府城東門外成化十五年

改今名 劉健記桂林劉公始易以石然為空太密不能

當潦水之怒而壞新昌何公令匠氏石其兩岸及底於中
大作一空屬之以鐵廣視其溝而深過之足垂永久

按潭橋上鑄一鐵牛當水衝蓋仿蜀中李陽
冰石犀壓水之義牛土畜所謂土尅水也

明澗河橋

李賢記洛城之西十里許曰澗河郡貳守王瓚

以建石橋聞詔可於水濱得大石若干為三洞高三丈八
尺長一百二十丈橫四丈

按澗河作橋於水濱得大石
無算澗河石橋古有之也

明仁惠橋

李通志仁惠橋在府城南門外

按洛舊志引洛陽記城西車馬橋
去城三十里未悉何代附見於此

以上洛陽

旅人橋水經注七里澗有石梁即旅人橋也昔孫登不

欲久居洛陽知楊氏榮不保終思欲遯跡林鄉隱淪忘死
楊駿埋此橋東搜神記曰太康末京洛始為折楊之歌駿
後被誅太后幽死折楊為之應橋皆纍石為之制作甚佳
雖時往損功而不廢行旅朱超石與兄書云橋去洛陽宮
六七里悉用大石下員以通水可受大舫過題其上云太
康三年十一月初就功日用七萬五千人至四月末止此
橋經破落復更修補今無復文字
伽藍記崇義里東有
七里橋以石為之中朝杜預之荊州出頓之所也

按七里橋即旅人橋
今入偃師已見前

隋通濟三橋

方輿紀要王世充自東都出兵擊李密至偃

師營于通濟渠南作三橋于渠上

以上偃師

唐孝義橋

會要天寶七載四月河南尹韋濟奏於偃師縣

東山下開驛路通孝義橋

六典水部凡天下造舟之梁

四河三洛一河則蒲津大陽盟津洛則孝義舉京都之衝

要也

按偃師驛路所通者今為鞏縣黑石渡黑石渡東北五里有孝義保以田氏紫荆名橋亦因此取名與

宋奉先橋

玉海景德四年二月西京新造管店渡橋癸酉

賜名奉先

按今鞏縣管店渡北岸山上有會聖宮為宋時謁陵飲福之所陵在洛南高原上由會聖宮過洛上陵必由此橋故名奉先

明柳橋

李通志柳橋在鞏縣東

以上鞏縣

晉富平河橋

晉武紀泰始十年九月立河橋于富平津

杜預傳預以孟津渡險有覆沒之患請建河橋于富平津

議者謂殷周所都歷聖賢而不作者必不可立故也預曰

造舟為梁則河橋之謂也及橋成武帝從百寮臨會舉觴

屬預曰非君此橋不立也對曰非陛下之明臣亦不得施

其微巧

李通志河橋在孟津縣東北

後魏河橋

方輿紀要永安三年魏主誅爾朱榮遣將軍奚

毅等將兵鎮北中時爾朱世隆自洛出屯河陰即欲北還

其黨曰兵不厭詐不如還軍向京師出其不意或可成功

世隆乃攻河橋據北中城引胡騎至郭下舉朝懼李苗請徑斷河橋許之賊入從馬渚上流乘船夜下去橋數里縱火船焚河橋修怨而至世隆兵在南岸者皆爭橋北渡橋絕溺者甚眾世隆遂收兵北遁既而爾朱兆從河橋西涉渡魏主被執承熙三年高歡自晉陽犯關魏主勒兵屯河橋歡尋自野王而南東魏武定元年高仲密以虎牢降西魏宇文泰率諸軍應之至洛陽前軍于謹圍河橋南城高歡將兵至河北泰退軍灑上縱火船於上流以燒河橋東魏將斛律金使別將張亮以小艇百餘載長鎖伺火將至卒釘之引鎖向岸橋獲全歡遂渡河據邙山與

秦相持

按後魏河橋屢經燒絕其必有更置也已非杜預之舊故別列之

後魏治坂橋

太宗紀神瑞八年造浮橋於治坂津

按治坂水經注作治坂注曰河陽故縣在治坂西北魏土地記治坂城舊名漢祖渡城嶮固南臨孟津河洛陽西北四十二里據是則治坂為大河北孟縣故城孟津在大河南不得通其名特橋抵南岸屬孟津耳

唐河陽浮橋

元和志河陽浮橋駕黃河為之以船為脚竹

簞且之

方輿紀要天寶十四載安祿山反遣將封常清

乘驛詣東京斷河陽楊橋為守禦之備乾元二年九節度

之師潰于相州郭子儀以朔方軍斷河陽橋保東京

按春秋後傳赧王五十八年秦始作浮橋于河為河橋之始

以上孟津

隋永濟橋

元和志河南府永濟橋在壽安縣西十七里大

業三年置架洛水隋亂毀廢正觀八年修造舟為梁長四
十丈五尺廣二丈六尺六典天下石柱之梁四洛三灞

一洛則天津永濟中橋灞則灞橋李通志永濟橋在宜

陽縣東北邵雍詩山背錦屏開河臨永濟廻

按元和志謂永濟橋造舟為梁而六典以為石柱之梁者蓋始則造舟為之其後易以石脚耳

明洛橋 畫橋 李通志洛橋在宜陽縣北畫橋在宜陽縣

西 以上宜陽

唐鹿橋 方輿紀要永寧唐移治鹿橋驛

明金門橋 長淵橋 李通志金門橋在永寧縣南長淵橋

在永寧縣西 以上永寧

明東澗橋 西澗橋 李通志東澗橋在新安縣東西澗橋

在新安縣西

明鐵門橋 李通志鐵門橋在新安縣西

按鐵門即水經注所謂缺門也鐵缺聲轉耳 以上新安

明雙津橋 李通志雙津橋在沔池西一里 沔池

明順陽橋 方輿紀要高都河出大礦山經嵩縣東關有順

陽橋跨其上

明錦陵橋 李通志錦陵橋在嵩縣北 以上嵩縣

河南府志卷之六十九終

開闢御道 李德裕論御道宜以渭水 以上御道

開闢御道 李德裕論御道宜以渭水 以上御道

開闢御道 李德裕論御道宜以渭水 以上御道

開闢御道 李德裕論御道宜以渭水 以上御道

開闢御道 李德裕論御道宜以渭水 以上御道

河南府志卷之七十

古蹟志十六

道路

漢御道

陸機洛陽記宮門及城中大道皆分作三中央御道兩邊築土墻高四尺餘外分之惟公卿尚書章服道從中道凡人皆行左右左入右出夾道種榆槐

隋御道

大業雜記宮城南臨洛水開大道濶一百步道傍植櫻桃石榴兩行四望成行人由其下中為御道

按洛陽四塞險固茲記道路一門本與關塞相表裏以謹武備乃先記兩都城御道以為發軔之始

隋白司馬阪道

方輿紀要隋大業九年楊元感于黎陽引

兵向洛使其弟元挺為先鋒自白司馬阪踰邙山南入

按白司馬阪在府東北三十里邙山東北垂也

後唐白沙道方輿紀要後唐同光三年獵於白沙明日宿

於伊闕又明日宿潭泊又明日宿龕洞明日還宮其地皆

在闕塞旁

按洛城南有伊闕道古洛城南有大谷道大谷通登封伊闕通嵩汝已詳前關塞門茲特取出入伊闕道記之

耳又洛陽東南有轅轅古道通登封東有鞏訾間道通汴京西通關陝有南北兩道南道由宜陽永寧入去嶠

古道也北道由新安澗池入陝州新道也北踰北邙渡河津隨津渡上下亦有數道其自東北由孟津循邙山

而東抵虎牢者亦古道也併詳在後各縣中

以上洛陽

唐東山下新道唐書地理志天寶七載尹韋濟以北坡道

迂自縣東山下開新道通孝義橋

按偃師北坡古道逕成湯墓前東北抵故鞏城道在邙山上不由黑石渡故黑石之險唐以前不紀迨韋濟開新道後路傍北邙南臨洛水而黑石遂為險要之地且由黑石趨鞏亦不循洛水逕故鞏城下而北坡古道遂不復問矣

偃師

晉鞏訾間道方輿紀要晉咸和三年石勒擊劉曜于洛陽

至成臯卷甲啣枚詭道兼行出于鞏訾之間

按所謂鞏訾之間者謂故鞏城與東訾也東訾近故鞏城詳前都邑門以鞏訾之間為詭道知由成臯趨洛陽大道不出鞏訾間也蓋自故鞏城下洛水流兩山間不容大道古道由偃師北坡抵故鞏城下踰洛由石子河踰嶺抵今鞏城乃趨成臯石勒所謂詭道乃循洛水岸隨抵洛陽不踰嶺上下故曰詭道兼行

隋羅口道方輿紀要隋大業十三年李密自羅口襲興洛

倉破之又密將張善相為伊州刺史據襄城自襄城北出羅口即長羅川口矣

按今鞏縣有羅口保乃羅水出山之口非羅水入洛之口也方輿紀要以為入洛處誤矣其自襄城北出羅口必逕登封由登封西北出轅轅乃東北趨鞏其道迂遠故徑自登封東踰大山北至羅口道甚險今各石板道乃由登趨鞏之要道也

唐出邙山北趨鞏道

方輿紀要武德四年世民圍東都

建德來援世民分兵圍守世充自將兵歷北邙抵河陽趨

鞏軍于武牢世充不敢出

按山洛陽趨鞏逕偃師不逕孟津然逕偃師入鞏道甚險隘由洛陽抵孟津循邙山北至虎牢道平易亦不甚迂遠亦兵家之要機也

孟津

唐福昌古道

富弼燕堂記唐二京往來南路近出福昌縣

側人甚驚至世以迴故徑取峭澗為東西道由是此道遂

僻

按福昌故道即通永寧峭底之南道也漢以前皆由此道曹魏改道後興廢不常燕堂記據近者為言遂以為唐二京往來故道耳併詳在下

唐興泰新道

唐書韋安石傳后嘗幸興泰宮議趨疾道安

石曰此道板築所成非自然之固千金子且誠垂堂况萬

乘可輕乘危哉后為回輦

以上宜陽

古轅轅道

史記禹通轅轅

唐書高宗屢如嵩山治轅轅

道如車箱

按輓轅有古道者對新道生稱也古道在東歷代設關之所今道在西自明以來行人皆由之有力者以石鋪道平夷可通車輿而輓轅古道之險遂鮮有行者矣

宋謝絳遊嵩道謝寄梅殿丞書出登封西門宿金店出穎

陽北門訪石堂山又宿呂氏店又宿彭婆鎮遂緣伊流陟

香山上下飲於八節灘上自長夏門入

按自洛陽抵嵩高東南道輓轅徑往不迂迺或南出大谷至登封乃孫堅入洛之道也或南出伊闕迺彭婆頰陽至登封乃謝絳遊嵩之道也二道亦不甚迂遠

金嵩山小路方輿紀要宋嘉定八年蒙古攻金潼關不能

下乃由嵩山小路趨汝州遇山澗輒以鉄鎗相連

橋以渡遂趨汴京金人大震蓋嵩高峻拔望為表極故能

越險而前也

以上登封

古嶠南道方輿紀要水經注嶠有盤嶠石嶠千嶠之山所

謂嶠有二陵則石嶠之山也自漢以前率多由此曹公惡

南路之險更開北道

按北道見後灑池而南道後周更復唐亦由南道通福昌互詳前後

後周南道杜佑通典自魏晉以來皆由北道後周初更復

南移以上永寧

曹魏嶠灑北道水經注建安中曹公西侵巴漢惡南路之

險更開北山高道自後行旅皆從之山側附路有石銘云

晉太康三年宏農太守梁柳修復舊道大嶠以東西嶠以

西明非一嶠也

按晉石銘曰修復舊道則南道在晉時固未盡廢也

隋夔冊道

方輿紀要隋紀大業初建東京廢三嶠道開夔

冊道此仍廢南道開北道也胡氏曰歷考東西二京往來

緣道離宮雜出於隋唐所置者俱不載所謂夔冊道山海

經云夸父之山多櫻柗其北曰桃林今山在湖縣西九里

或者櫻柗為夔冊歟

前紀要以夔冊道為北道即曹公所開之北道也北道在澠池南道在永寧二道至陝州已合為一則所謂開

古制

夔冊道者自據澠池北道為言胡氏不詳夔冊之義乃牽合湖縣夸父櫻柗為解湖縣今閩鄉也廢道開道總

夔嶠澠池分合之間何得西越陝州行百餘里至閩鄉乃開道也

以上澠池

古三塗

春秋地名考三塗在河南陸渾縣南服虔云三塗

太行轅轅嶠澠也二說不同

按武王謂南望三塗則三塗在王城南伊闕外為是服虔所指為非左傳請有事於三塗祭山曰有事則三塗為山名無疑然山以三塗名則此山谷澗間必通三道道當在今嵩縣不得如服氏所指

驛遞

漢洛陽都亭

前漢嚴延年傳延年母從東海來欲從延年至

臘到雒陽適見報囚母大驚便止都亭不肯入府延年至

都亭謁母母閉閣不見延年免冠頓首閣下良久乃見之

因數責延年不聞仁愛教化顧乘刑罰多殺人欲以立威

豈為民父母意哉延年服罪為母御歸府舍母舉正臘謂

延年天道神明不可獨殺我不意當老見壯子被刑戮也
行矣去女東歸埽除墓地耳去後歲餘果敗

按漢都亭驛亭也張剛埋輪事見亭門何進屯都亭事見屯堡門茲取延年母止都亭事見為郵舍止息之處耳

漢雜舍 方輿紀要袁紹誅宦官中常侍張讓等將帝步出
穀門至小平津讓等投河死帝夜從小平津步至雜舍雜
舍者卬山之北驛舍也

晉石樓驛

晉書惠帝紀太安二年河間王顥成都王穎遣

將逼京師帝幸十三里橋旋軍于宣武場庚午舍于石樓
天中裂無雲而雷 方輿紀要石樓驛在故洛城東北

明周南驛

方輿紀要洛陽縣治東南有周南驛

以洛陽

漢尸鄉廐置

史記田儋列傳田橫入海居島中高帝使使

持節告曰田橫來大者王小者廼侯耳不來且舉兵加誅
焉田橫廼與其客二人乘傳詣雒陽未至三十里至尸鄉
廐置橫謝使者曰八臣見天子當洗沐止留謂其客曰橫
始與漢王俱南面稱孤今漢王爲天子而橫廼爲亡虜而
北面事之其耻固已甚矣且吾亭人之兄與其弟併肩而
事其主縱彼畏天子詔不敢動我我獨不媿于心乎且陛
下所以欲見我者不過欲一見我面貌耳今陛下在洛陽
斬吾頭馳三十里間形容尚未能敗猶可觀也遂自剄令
客奉其頭從使者馳奏之高帝曰嗟乎有以也夫起自布

衣兄弟三人更王豈不賢乎哉為之流涕以王者禮葬田

橫注廐置者置馬以傳驛也

明首陽驛

方輿紀要首陽驛在偃師縣城西 以上偃師

明洛口驛

方輿紀要鞏縣東有洛口驛 鞏縣

後魏甘棠驛

名勝志後魏析置甘棠縣縣西北有勝因寺

卽甘棠驛故址

宜陽

唐鹿橋驛

方輿紀要永寧唐貞觀初移泊莎柵後又移治

鹿橋驛

唐柳泉傳舍

唐書叛臣傳史思明使朝義攻陝敗退避永

寧思明大怒將誅而釋之又敕築三角城怒不如約朝義

懼思明居傳舍駱悅等共說朝義行大事許之思明愛優

諱寢食常在側優者以其忍恨之是夜思明驚據牀叱咤

優問故答曰我夢羣鹿渡水鹿死而水乾云何俄如區悅

以兵入優共指區思明踰垣出至廐下將乘馬走悅麾下

射其臂墜左右反接縛之送柳泉傳舍縊殺思明

按柳泉驛在鹿橋驛東見方輿紀要

以上永寧

明函關驛

義昌遞運所

慈澗遞運所

地輿記函關驛

在新安

方輿紀要新安西八里為義昌遞運所東三十

里為慈澗遞運所

按義昌遞運所者西達澗池義昌驛也

新安

明蠶地驛

廣輿記蠶城驛在澠池

明義昌驛

方輿紀要義昌驛在澠池東四十里志云漢三

老董公于此遮說漢王為義帝發喪因名

按董公說漢高處據水經注以為在平陰陸機所謂蟠
蟠董叟謨我平陰者也而澠池又有義昌驛本鎮名謂
為義帝發喪而漢昌也

以上澠池

倉場

漢河南倉

史記汲黯傳河內失火上遣黯往視之還報曰

家人失火屋比延燒不足憂也臣過河南河南貧人傷水
旱萬餘家或父子相食臣謹以便宜持節發河南倉粟以
賑貧民臣請歸節伏矯制之罪上賢而釋之

按前漢書汲黯傳作過河內發河內倉與史記異夫汲
黯往河內視火必路經河南故曰過河南若如漢書則
黯既至河內不得出過
河內自當以史記為是

漢常平倉

前漢嚴延年傳延年遷河南太守河南界中有

蝗蟲府丞義出行蝗還見延年延年曰此蝗豈鳳皇食耶

義又道司農中丞耿壽昌為常平倉利百姓延年曰丞相

御史不知為也當避位去壽昌安得權此

按耿壽昌白令邊郡皆築倉以穀賤時增其價而糴以
利農穀貴時減價而糶以贍貧民名曰常平倉據延年
傳則河南亦舊設常平倉不獨邊郡也又東漢永平十
年帝欲置常平倉公卿議者多以為便劉般以為常平外
有利民之名而內實侵刻百姓豪右因緣為姦小民不
得其平置之不便帝乃止見後漢劉般傳而通典則曰
漢明帝永平五年作常平倉據晉志以為永平五年作
常滿倉是既作常滿倉又欲作常平倉因劉般言而止

也通典
當有誤

漢太倉 後漢百官志太倉令一人六百石主受郡國轉漕穀 堅鐔傳注洛陽記曰建始殿東有太倉

漢常滿倉 晉志顯宗即位天下安寧民無橫徭歲比登稔

永平五年作常滿倉立粟市於城東粟斛直錢三十草木
殷阜牛羊彌望作貢尤輕府廩還積 述征記東城二石

橋舊於王城之東北開渠引洛水名曰陽渠東流經洛陽
於城之東南北迴通運至建春門以輸常滿倉

按平帝紀有常滿倉又見王莽傳
蓋東都常滿倉乃因西漢舊名也

晉城東太倉 武帝紀咸寧二年九月丁未起太倉於城東

常平倉於東西市 水經注穀水又北逕故太倉西洛陽

地記曰大城東有太倉倉下運般常有千計

按水經注記晉太倉在城東與武帝紀合伽藍記所謂
中朝時常滿倉在建春門外者即城東太倉也顧不曰
大倉而曰常滿倉者所以別於建春門內晉太倉
也晉太倉有二一在城東一在建春門內詳在下

晉建春門內太倉 伽藍記杜預注春秋云翟泉在晉太倉

西南晉太倉在建春門內御道北有空地擬作東宮晉中
朝時太倉處也太倉南有翟泉周迴三里即春秋所謂翟

泉也

按水經注伽藍記辨翟泉有二處而皆以在洛陽東北
建春門內為是二書略同但水經注不知晉太倉有在
建春門內者而以杜預所指翟泉為在東陽門內魏太
倉西南遂力斥杜預及京相璠裴司空彦季修晉輿地

圖之非惟伽藍記以杜預所謂太倉西南者為建春門內之太倉則杜預所指自不妄而水經注反疎緣不知晉太倉有在城內故也

後魏太倉 水經注渠水歷司空府前逕太倉南 伽藍記
今太倉在東陽門內

後魏常平倉 玉海元魏太和二十年閏十月戊辰置常平倉

按元魏遷洛在太和十九年

後魏租場 伽藍記莊嚴寺東有中朝時常滿倉高祖令為租場天下貢賦所聚蓄也

按後魏租場即水經注所謂晉太倉故處在陽渠南

隋含嘉倉

方輿紀要在東都城北隋含嘉倉城也隋志在洛陽羅郭內自為一城附于宮城東南

隋回洛倉

玉海大業二年十月置回洛倉於洛陽北城周十里穿三百窖窖容八百石

按方輿紀要辨回洛倉當入今孟津說詳在後

隋子羅倉

大業雜記右掖門街西有子羅倉倉有鹽二十萬石子羅倉西有粳米六十餘窖窖別受八千石窖西至

西城

唐洛陽常平倉

會要正觀十三年十二月十三日壬午詔於洛相等州置常平倉粟藏九年米藏五年下濕之地粟

隋書

古蹟志

倉場

藏五年米藏二年皆著于令開元七年六月二十八日河南等五道並置常平倉十六年敕加時價三錢收糴廣德二年第五琦請天下常平倉皆置庫以蓄本錢

按玉海唐常平本錢元宗取之客戶如宇文融請校天下籍收匿戶帝詔以客賦所在並建常平倉是也德宗取之茶漆如趙贊請於兩都置常平本錢諸道津會置吏收稅以贍常平本錢是也憲宗取之地稅如元和制州府所稅地子數內十分取二均充常平倉是也文宗取之回易如大和九年以天下回易錢置常平義倉本錢是也大抵常平之法本周官旅師及魏平糴而籍征贍本又唐人之法也

唐含嘉倉 六典注東都則曰含嘉倉倉部郎中掌倉庾凡都之東租納於都之含嘉倉自含嘉倉轉運以實京之太倉自京至陝運於陸自陝至京運於水量其遞運節制置

使以監統之 會要正元十四年十二月以河南府穀貴

人流令以含嘉倉粟七萬石出糴 玉海楊慎矜弟慎名

元宗擢為含嘉倉出納使

宋景德常平倉 會要景德三年戚綸上封事請於京東西等處各置常平倉

按常平倉歷代不廢其義倉社倉置於隋唐者宋亦時為修復到處有之而無跡可記故不列又朱子社倉之法乃取崇安已行事宜奏于朝頒行諸道在南渡後不行于北 以上洛陽

隋興洛倉 隋書地理志鞏縣有興洛倉 虞世基傳帝幸

江都次鞏縣世基以盜賊日盛請發兵屯洛口倉以備不

虞帝不從但答云卿是書生定猶懼怯 李密傳密與讓

領精兵七千人以大業十三年春出陽城北踰方山自羅口襲興洛倉破之開倉恣民所取老弱襁負道路不絕越王侗武賁郎將劉長恭率步騎二萬五千討密密一戰破之長恭僅以身免讓於是推密為主密城洛口周廻四十里以居之

玉海大業二年置洛口倉於鞏城周二十里穿三千窖

按興洛倉即洛口倉也隋置倉于鞏者以鞏東南原上地高燥可穿窖久藏且下通河洛漕運也

唐洛口倉 **唐書地理志**鞏縣有洛口倉 **六典注**隋初漕關東之粟以實京邑有洛口倉唐因之 **唐書食貨志**宣州刺史裴耀卿條上便宜曰今漢隋漕路瀕河倉廩遺跡

可尋可於河口置武牢倉鞏縣置洛口倉使江南之舟不入黃河黃河之舟不入洛口而河陽栢崖太原永豐渭南諸倉節級轉運水通則舟行水淺則寓於倉舟無停留而物不耗失此甚利也

以上鞏縣

隋回洛倉 **方輿紀要**回洛城在孟津舊縣東唐志河陽關南有回洛城以方俟洛勒兵不動魏人去之而名隋於其地置回洛倉隋紀以為洛陽北七里似誤

隋回洛東倉 **煬帝紀**大業十三年四月癸巳李密陷回洛東倉

按隋紀於回洛既別之曰東倉是有二倉也故並出之

隋河陽倉

隋書地理志偃師有河陽倉

按隋無孟津縣故偃師有河陽倉今偃師北不至河其地入孟津

唐栢崖倉

唐書地理志河清有栢崖倉

按隋唐置回洛河陽栢崖倉于孟津者以近都畿通河運為便也

以上孟津

庫藏

漢雒陽武庫

魏相傳田千秋子為雒陽武庫令霍光曰武

庫精兵所聚故用丞相子為令

吳王濞傳桓將軍曰疾

西據雒陽武庫阻山河之險以令諸侯天下定矣

周亞

夫傳趙涉遮說曰將軍從此右去走藍田出武關抵雒陽

直入武庫擊鳴鼓諸侯聞之以為將軍從天而下

史記

齊王閔世家曰洛陽有敖倉武庫

後漢堅鐔傳與朱鮪

戰洛陽武庫下注洛陽記建始殿東有太倉倉東有武庫

藏兵之所世祖初即位時已有之

馬嚴傳顯宗拜將軍

長史將兵屯西河敕嚴過武庫祭蚩尤帝親御阿閣觀之

漢少府

後漢百官志凡山澤陂池之稅名曰禁錢屬少府

世祖改屬司農

漢中藏

後漢百官志中藏府令一人六百石本注曰掌中

幣帛金銀諸貨物丞一人

晉武庫

五行志元康五年閏月庚寅武庫火張華疑有亂

先命固守後救火是以累代翼寶王莽頭孔子履漢高祖

斷白蛇劍及二百萬人器械一時蕩盡華見劍穿屋而飛莫知所向

按晉太康龍二見於武庫井中又鯉魚二見於武庫屋上干寶以為武庫兵府魚有鱗甲亦兵類

後魏武庫 伽藍記西陽門內有武庫署即魏相國司馬文王府武庫東至閭闔門是也

隋左右藏 大業雜記泰和門內即左右藏左藏有庫門六重重二十五間間一十七架總一百五十間右藏屋兩重總四十間屋大小如左藏

隋輦庫 大業雜記右掖門街西有輦庫
內甲庫 大業雜記景運門內道左有內甲庫

唐東都庫 六典左藏令掌庫藏之事左藏有東西庫朝堂庫又有東都庫東都朝堂庫掌木雌契一與太府主簿合之右藏令掌寶貨之事隋太府寺統右藏令丞皇朝因之右藏有內外庫東都庫各木雌契一隻與太府主簿合之太府卿諸州庸調折租等物送京者貯左藏其雜送物並貯右藏
以上洛陽

河南府志

卷之七

三

